

四庫全書

史部

欽定四庫全書

史部

通志卷八十四下

詳校官侍讀臣陳萬青

編修臣裴謙覆勘

覆校官助教臣金學詩

校對官助教臣汪錫魁

謄錄監生臣鄭嶠

欽定四庫全書

通志卷八十四下

宋右迪功郎鄭樵漁仲撰

宗室傳第七下

景穆十二王

景穆皇帝十四男恭皇后生文成皇帝袁椒房生陽平
幽王新成尉椒房生京兆康王子推濟陰王小新成陽
椒房生汝陰靈王天賜樂良厲王萬壽廣平殤王洛侯

母並闕孟椒房生任城康王雲劉椒房生南安惠王楨
城陽康王長壽慕容椒房生章武敬王太洛尉椒房生
樂陵康王胡兒孟椒房生安定靖王休趙王深早薨無傳
母闕魏舊太子後庭未有位號文成即位景穆宮人有
子者並號為椒房

陽平王新成太安三年封後為內都大官薨諡曰幽長
子安壽襲爵孝文後賜名頤累遷懷朔鎮大將都督三
道諸軍事太和中北討蠕蠕詔徵赴京勗以戰伐之事

對曰當仰仗廟筭使呼韓同渭橋之禮帝歎曰壯哉王
言朕所望也未發遭母憂詔侍臣以金革敦喻既殯而
發與左僕射陸贄集三道諸將議軍途所詣於是中道
出黑山東道趣士盧河西道向侯延河軍過大磧大破
蠕蠕頤入朝詔曰王之前言果不虛也後除朔州刺史
及恒州刺史穆泰謀反遣使推頤為主頤密以狀聞泰
等伏誅帝甚嘉之宣武景明元年薨於青州刺史謚曰
莊王傳國至孫宗允明帝時坐殺叔父賜死爵除頤弟

衍字安樂賜爵廣陵侯位梁州刺史表請假王以崇威重詔責之轉徐州刺史至州病重帝敕徐成伯乘傳療之疾差成伯還帝曰卿定名醫賚絹三千疋成伯辭請受一千帝曰詩云人之云亡邦國殄瘁以是而言豈惟三千疋乎其為帝所重如此後所生母雷氏卒表請解州詔曰先君餘尊之所厭禮之明文季末陵遲斯典或廢侯既親王之子宜從餘尊之義便可大功後卒於雍州刺史謚曰康侯衍性清慎所在廉潔又不營產業歷

牧四州皆有稱績亡日無歛屍之具子暢字叔暢從孝
武入關拜鴻臚封博陵王大統三年東討沒於陣子敏
嗜酒多費家為之貧其壻柱國乙弗貴大將軍大利稽
柘家貲皆千萬每營給之敏隨即散盡而帝不之責貴
柘後遂絕之位儀同三司改封南武縣公暢弟融字叔
融貌甚短陋驍武過人莊帝謀殺爾朱榮以融為直閤
將軍及爾朱兆入洛融逃人間後從孝武入關封魏興
王位侍郎殿中尚書衍弟欽字思若位中書監尚書右

僕射儀同三司欽色尤黑故時人號為黑面僕射欽淫從兄麗妻崔氏為御史中尉封回劾奏遇赦免尋除司州牧欽少好學早有令譽時人語曰皇宗畧畧壽安思若及晚年貴重不能有所匡益論者輕之欽性吝遇客甚薄嘗託青州人高僧壽為子求師師至未幾逃去欽以讓僧壽僧壽性滑稽反謂欽曰凡人絕粒七日乃死始經五朝便爾逃遁去食就信實有所闕欽乃大慙於是待客稍厚後除司空公封鉅平縣公於河陰遇害贈

假黃鉞太師太尉公。子子孝，字季業。早慧，年八歲，司徒崔光見而異之，曰：「後生領袖必此人也。」孝武入關，不及從，駕後赴長安，封義陽王子。孝美容儀，善戲謔，好酒，愛士，縉紳歸之。賓客滿座，終日無倦性。又寬慈敦睦，親族乃置學館於私第，集羣從子弟，晝夜講讀，并給衣食。與諸子同後，歷尚書令、柱國、大將軍。子孝以國運漸移，深自貶晦，日夜縱酒，後例降為公，復姓拓拔氏。未幾卒。子

贊嗣

京兆王子推太安五年封位侍中征南大將軍長安鎮大將子推性沈雅善於綏接秦雍之人服其威惠入為中都大官察獄有稱獻文將禪位於子推以大臣固諫乃傳孝文孝文即位拜侍中本將軍開府儀同三司青州刺史未至道薨子太興襲拜長安鎮大將以黷貨削除官爵後除祕書監還復前爵改封西河轉守衛尉卿初太興遇奇疾醫言不可為遂日供諸沙門冀以愈病他日齋罷庭空有一沙門方至云丐餘食太興戲之曰

蔬茹俱盡獨有酒肉耳命取酒一斗羊一臠薦之沙門欣然曰固所欲也引滿大嚼無餘既出侍人徹器而所獻酒肉故具在太興驚噩遽命左右追之四向無所見乃於佛前乞願曰向者天人肉眼不辨若此疾遂已當舍王爵入道已而所患灑然遂表請為僧章十餘上乃見許時孝文南討在軍詔皇太子於四月八日下髮施帛二千疋既為沙門名僧懿居嵩山太和二十二年終子昂字伯暉襲薨昂子悰字魏慶襲孝靜時累遷太尉

錄尚書事司州牧青州刺史薨於州詔贈假黃鉞太傅
司徒公諡曰文愨寬和有度量美容貌風望儼然得喪
之間不見於色性清儉不營產業身死之日家無餘財
昂弟仲景性嚴峭孝莊時兼御史中尉京師肅然每向
臺恒駕赤牛時人號赤牛中尉太昌初為河南尹奉法
無私時吏部尚書樊子鵠部下縱橫又為盜竊仲景密
加收捕悉獲之咸即行決於是豪貴寒心孝武帝將入
關授仲景中軍大都督留京師齊神武欲至洛陽仲景

遂棄妻子追駕至長安仍除尚書右僕射封順陽王仲
景既失妻子乃娶故爾朱天光妻也列氏也列氏本倡
也有美色仲景惑之後數歲故妻叔袁紇氏自洛陽間
行詣仲景也列遂徙居別宅久之有姦事露詔仲景殺
之仲景寵情逾至謬殺一婢蒙其屍而葬焉潛匿也列
僻處人無知者叔袁紇所生三子濟鍾奉皆以宗室早
歷清官仲景以也列尚在終為妻子漏言乃謀殺叔袁
紇以滅口叔袁紇知之欲先手也列也列謂其從奴曰

誠使叔袁紇殺我必投我圜濶中污穢我儻告宇文丞相冀或不死就令不理首愆猶埋我好地得骨肉親土爾為我告之奴遂告於周文周文依奏詔答仲景一百免右僕射以王歸第也列以自告免死而逐之仲景猶私不已又有告者詔重答一百付宗正官爵盡除既而仲景仍通焉周文以其歷仕有令名且杖策隨駕乃奏復官爵令叔袁紇與也列同居大統五年除幽州刺史仲景後復多內亂就州賜死仲景弟退字叔照孝莊初

除南兖州刺史在州猛暴多所殺害元顥入洛退據州
不屈莊帝還宮封汝陽王累遷秦州刺史先是秦人屢
為反覆退盡誅之存者十一二普泰元年除涼州刺史
貪暴無極欲規府人及商賈富人財物詐為臺符請諸
豪等云欲加賞及至一時屠戮所有資財生口悉沒自
入孝靜時位侍中錄尚書事薨贈太師子冲襲無子國
絕太興弟遙字太原有器望以左衛將軍從孝文南征
賜爵饒陽男宣武初遭所生母憂表請解任詔以餘尊

所厭不許明帝初累遷左光祿大夫仍領護軍時冀州沙門法慶為妖幻說渤海人李歸伯歸伯合家從之招率鄉人推法慶為主法慶以歸伯為十住菩薩平魔軍司定漢王自號大乘殺一人者為一住菩薩殺十人者為十住菩薩又合狂藥令人服之父子兄弟不相知識唯以殺害為事刺史蕭寶夤遣兼長史崔伯麟討之敗於煮棗城伯麟戰沒凶衆遂盛所在屠滅寺舍斬戮僧尼焚燒經像云新佛出世除去衆魔明帝詔以遙為使

持節都督北征諸軍事討破之禽法慶并其妻尼惠暉
等斬法慶傳首京師其黨戮於都市初遙大功昆弟皆
是景穆之孫至明帝而本服絕故除遙等屬籍遙表曰
竊聞聖人所以南面而聽天下其不可得變革者則親
也尊也四世而總服窮五世而袒免六世而親屬竭矣
去茲以往猶繫之以姓而弗別綴之以食而弗殊又律
云議親者非唯當世之屬親歷謂先帝之五世謹尋斯
旨將以廣帝宗重磐石先帝所以變諸事條為此別制

者太和之季方有意於吳蜀經始之費慮深在初割減之起暫出當時也且臨淮王提分屬籍之始高祖賜帛三千疋所以重分離樂良王長命亦賜縑二千疋所以存慈眷此皆先朝慙懃克念不得已而然者也古人有言百足之蟲至死不僵者以其輔已者衆臣誠不欲妄親太階苟求潤屋但傷大宗一分則天子屬籍不過十數人而已在漢親王之子不限多少皆別土而封謂之王子侯至于魏晉莫不廣胙山河稱之曰公者蓋惡其

大宗之不固骨肉之恩疏矣臣去皇上雖是五世之遠
於先帝便是天子之孫高祖所以國秩祿賦復給衣食
后族唯給其賦不與衣食者欲以別內外限異同也今
諸廟之感在心未忘行道之悲倏然已及其諸封者身
亡之日三年服終然後改奪今朝廷猶在過密之中便
議此事實用未安詔付尚書博議以聞尚書令任城王
澄尚書左僕射元暉奏同遙表靈太后不從卒諡曰宣
公遙弟恒字景安粗涉書史恒以春秋之義為名不以

山川表求改名芝歷位太常卿中書監侍中後於河陰遇害贈太傅司徒公諡曰宣穆

濟陰王小新成和平二年封頗有武略庫莫奚侵擾詔新成討之新成乃多為毒酒賊逼便棄營而去賊至競飲遂簡輕騎縱擊俘馘甚多後位外都大官薨贈大將軍諡曰惠子鬱字伏生襲位開府為徐州刺史以黷貨賜死國除長子弼字邕明剛正有文學位中散大夫以世嫡應襲先爵為季父尚書僕射麗用于氏親寵橫奪

弼王爵授同母兄子誕弼於是謝絕人事託疾還第宣武徵為侍中弼上表固讓入嵩山以穴為室布衣蔬食卒建義元年子暉業訴復王爵永安三年追贈尚書令司徒公諡曰文獻初弼嘗夢人謂之曰君身不得傳世封其紹先爵者君長子紹遠也弼覺即告暉業終如其言暉業少險薄多與寇盜交通長乃變節涉獵子史亦頗屬文而慷慨有志節歷位司空太尉加特進領中書監錄尚書事齊文襄嘗問之曰比何所披覽對曰數尋

伊霍之傳不讀曹馬之書文襄銜之暉業以時運漸謝
不復圖全唯事飲噉一日三羊二日一犢又嘗賦詩云
昔居王道泰濟濟富羣英今逢世路阻狐兔鬱縱橫齊
初降封美陽縣公開府儀同三司特進暉業之在晉陽
也無所交游居常閒暇乃撰魏藩王家世號為辨宗錄
四十卷行於世位望隆重又以性氣不倫每被猜忌天
保二年從駕至晉陽於宮門外罵元韶曰爾不及一老
嫗背負鹽與人何不打碎之我出此言知即死然爾亦

詎能幾時文宣聞而殺之并斬臨淮公孝友孝友臨刑
驚惶失措暉業神色自若仍鑿氷沈其屍暉業弟昭業
頗有學尚位諫議大夫遷給事黃門侍郎衛將軍右光
祿大夫卒諡曰文侯鬱弟偃位太中大夫子誕字曇首
初誕伯父鬱坐貪污賜死爵除詔以誕偃正妃子立為
嫡孫特聽紹封累遷齊州刺史在州貪暴人有牛馬騾
驢無不見奪奴隸悉逼取良人為婦有沙門為誕採藥
還見誕問外議云何對曰唯言王貪願王早代誕曰齊

州七萬家吾蒞州家未得三十錢詎得此謗邪後為御史中尉元纂所糾會赦免薨諡曰靜王子撫字伯懿襲莊帝初為從兄暉業訴奪王爵偃弟麗字寶掌位兼宗正卿右衛將軍遷光祿勳宗正右衛如故時秦州屠客王法智推州主簿呂苟兒為主號建明元年置立百官攻逼州郡涇州人陳瞻亦聚衆稱王號聖明元年詔以麗為使持節都督與楊椿討之苟兒率衆十餘萬屯孤山別遣將據諸險要圍逼州城麗出擊大破之遂進軍

永洛賊徒逆戰麗夜擊走之行秦州事李韶破苟兒子
孤山乘勝追掩獲其父母妻子諸城之圍亦悉奔散苟
兒率其王公三十餘人詣麗請罪麗因平賊之勢掠平
民七百餘人以為俘宣武嘉其功詔有司不聽追檢拜
雍州刺史為政嚴酷吏民患之其妻崔氏誕男麗出死
囚及徒流罪者一時放免遷冀州刺史多行殘虐入為
尚書左僕射帝問曰聞公在州濫刑非一又多殺道人
寧有之乎對曰臣在冀州可殺道人二百許亦復何多

帝曰一物不得其所若納諸隍況殺道人二百而言不多乎麗脫冠謝卒諡曰威子顯和少有節操歷司徒記室參軍除徐州安東府長史刺史元法僧叛顯和與戰被禽法僧執手命與連坐顯和曰顯和與阿翁同源別派皆是磐石之宗一朝以地外叛若遇董狐能無慙德遂不肯坐法僧猶欲慰喻顯和曰乃可死作惡鬼不能生為叛臣及將殺之神色自若建義初贈秦州刺史汝陰王天賜和平三年封後為內都大官孝文初殿中

尚書胡莫寒簡西部敕勒豪富兼丁者為殿中武士而
大納財貨衆怒殺莫寒及高平假鎮將奚陵於是諸部
敕勒悉叛詔天賜與給事中羅雲討之前鋒敕勒詐降
雲信之敕勒遂襲殺雲天賜僅得自全累遷懷朔鎮大
將坐貪殘恕死削除官爵卒孝文哭於思政觀贈本爵
葬從王禮諡曰靈王子逞字萬安卒於齊州刺史諡曰
威逞子慶和東豫州刺史為梁將所攻舉城降之梁武
以為北道總督魏王至項城朝廷出師討之望風退走

梁武責之曰言同百舌膽若鼷鼠徙於合浦逞弟汎字
普安自元士稍遷營州刺史性貪殘人不堪命相率逐
之汎走平州後除光祿大夫宗正卿封東燕縣男於河
陰遇害汎弟脩義字壽安頗有文才自元士稍遷齊州
刺史脩義以齊州頻喪刺史累表固辭詔不許聽隨便
立治所脩義乃移治東城為政寬和遷秦州刺史明帝
初表陳庶人禧庶人愉等請宥前愆賜葬陵域靈太后
詔曰收葬之恩事由上旨藩岳何得越職干陳在州多

受納累遷吏部尚書及在銓衡惟事貨賄授官大小並有定價時中散大夫高居者例合先叙上黨郡缺居遂求之脩義私已許人抑居不與居大言不遜脩義命左右牽曳之居大聲呼曰有賊在人問居曰白晝公庭賊何許來居指脩義曰此坐上者盜天子名器私貨於人而多收其直非賊乎豈必入市攫金而後為賊也脩義失色居行罵而去後欲邀駕論脩義罪左僕射蕭寶夤喻止之三秦反假脩義兼尚書右僕射西道行臺行秦

州事為諸軍節度脩義性好酒每飲連日遂遇風病神明昏喪雖至長安竟無部分之益元志敗沒賊東至黑水更遣蕭寶夤討之以脩義為雍州刺史卒於州追贈司空諡曰文子均位給事黃門侍郎後入西魏封安昌王位開府儀同三司薨諡曰平子則字孝規襲爵位義州刺史仕周為小冢宰江陵總管子文都性梗直仕周為右侍上士隋開皇初授內史舍人煬帝即位累遷御史大夫坐事免未幾授太府卿甚有當時譽大業十三

年帝幸江都宮詔文都與段達皇甫無逸韋津等同為東都留守帝遇害文都與達津等共推越王侗為帝侗署文都為內史令開府儀同三司光祿大夫左驍衛大將軍攝右翊將軍魯國公既而宇文文化及立秦王浩為帝擁兵至彭城所在響應文都諷侗遣使通於李密以拒化及密請効命因授密官爵王世充不悅深忌文都侗以文都領御史大夫世充固執而止盧楚說文都誅世充文都懷奏入殿或以告世充世充馳還含嘉城至

夜攻東太陽門而入拜於紫微觀下曰請斬文都歸罪
司寇伺見兵勢盛遣將軍楊桃樹執文都以出文都顧
謂伺曰臣今朝亡陛下亦當夕及伺慟哭遣之左右莫
不閤默出至興教門世充令左右亂斫之諸子並見害
則弟矩字孝矩西魏時襲賜爵始平縣公拜南豐州刺
史時見元氏將危陰謂昆季曰宇文之心路人所見顛
而不扶焉用宗子為兄則所遏乃止後周文為兄子晉
公護娶其妹為妻情好甚密及護誅坐徙蜀後拜司獻

大夫隋文帝重其門第娶其女為房陵王妃及為丞相
拜少冢宰位柱國賜爵洵陽郡王及房陵立為皇太子
立其女為皇太子妃親禮彌厚拜壽州總管時陳將任
蠻奴等屢寇江北復以孝矩領行軍總管屯兵江上後
以年老上表乞骸骨轉涇州刺史卒官謚曰簡子無竭
嗣矩次弟雅字孝方有文武幹用開皇中歷左右領軍
將軍集沁二州刺史封順陽郡公雅弟褒字孝整幼有
成人量年十歲而孤為諸兄所愛養善事諸兄諸兄議

欲別居。褻泣諫，不從。家素富多金寶。褻一無所受，脫身而出仕。周位開府北平縣公。趙州刺史從韋孝寬平尉遲迴，以功拜柱國。進封河間郡公。隋開皇中，拜原州總管。有商人遇劫，疑同宿者所為，執以詣州。褻察其色，寃而辭正。即舍之。商人詣闕訟。褻受金，縱賊。文帝遣使窮治。使者簿責褻。褻引咎，無異辭。使者將褻詣京師，坐免官。其盜尋發，他所上謂曰：「何至自誣？」褻曰：「臣受委一州，不能息盜罪一也。百姓為人所誣，不付法司，旋即放免。」

罪二也不顧形迹至令為物所疑罪三也臣有三罪何
所逃責臣又不言受賂使者復將有所窮究然則縲紲
橫及良善又重臣之罪是以自誣上歎異之稱為長者
煬帝即位拜齊郡太守及遼東之役郡官督事者前後
相屬有西曹掾當行詐疾褻杖之掾大言曰我將詣行
在欲有所告褻大怒因杖百餘數日死坐免官卒于家
樂良王萬壽和平三年封拜征東大將軍鎮和龍性貪
暴徵還道憂薨諡曰厲王子康王樂平襲薨子長命襲

坐殺人賜死國除子忠明帝時復前爵位太常少卿孝武帝汎舟天泉池令宗室諸王陪宴忠愚而無智性好衣服遂著紅羅襦繡作領碧紬袴錦為緣帝謂曰朝廷衣服應有常式何為着百戲衣忠曰臣少來所愛帝曰人之無良乃至此乎

廣平王洛侯和平二年封薨諡曰殤無子後以陽平幽王第五子匡後之匡字建扶性耿介有氣節孝文器之謂曰叔父必能儀刑社稷匡弼朕躬今可改名為匡以

成克終之美宣武即位累遷給事黃門侍郎時始皓始有寵百僚微憚之帝嘗於山陵還詔匡陪乘又命皓登車皓褰裳將上匡諫帝推之令下皓恨匡失色當時壯其忠蹇宣武親政除肆州刺史匡既忤皓懼為所害廉慎自脩甚有聲績遷恒州刺史徵為大宗正卿河南邑中正匡奏親王及始藩二藩王妻悉有妃號而三藩以下皆謂之妻上不得同為妃名而下不及五品以上有命婦之號竊以為疑請賜三藩王妻亦從妃例詔從之

後除度支尚書匡表引樂陵章武王例求紹洛侯封詔
付尚書議尚書奏聽襲封以明興絕之義時宣武委政
於高肇宗室傾憚唯匡與肇抗衡先自造棺置於聽事
常言當與此詣闕論肇罪惡然後自殺肇聞而惡之後
因與太常卿劉芳議爭權量遂與肇聲色御史中尉王
顯奏匡曰自金行失御羣僞競興禮壞樂崩彛倫攸斁
高祖孝文皇帝以睿聖統天克復舊典乃命故中書監
高閭廣旌儒林推尋樂府以忝裁寸將均周漢舊章屬

雲構中遷尚未云就高祖睿思元深參考經記以一黍之大用成分體準之為尺宣布施行暨正始中故太樂令公孫崇輒自立意以黍十二為寸別造尺度定律刊鐘皆向成訖表求觀試時敕太常卿臣芳以崇造既成請集朝英議其得否芳疑崇尺度與先朝不同察其作者於經史復異推造鮮據非所宜行時尚書令臣肇清河王懌等以崇造乖繆與周禮不同遂奏臣芳依周禮更造成訖量校從其善者而芳以先朝尺度事合古典

乃依前詔書以黍刊寸並呈朝廷用裁金石于時議者多云芳是唯黃門侍郎臣孫惠蔚與崇扶同二途參差頻經考議而尚書令臣肇以芳造崇物故之後而惠蔚亦造一尺仍云扶以比崇尺自相乖背量省二三謂芳一尺為得而尚書臣匡表云劉孫二尺長短相傾稽考兩律所容殊異言取中黍校彼二家云並參差折中無所自立一途請求議判當時議者或是於匡兩途舛駁未即時定肇又云權斛斗尺班行已久今者所論豈踰

先旨宜仰依先朝故尺為定自爾以後而匡與肇厲言都坐聲色相加高下失其常倫導競無復彝序匡更表列據已十是云芳十非又云肇前被敕旨共芳營督規立鐘石之名希冀制作之譽乃憑樞衡之尊藉舅氏之勢與奪任心臧否自己阿黨劉芳遏絕臣事望勢雷同者接以恩言依經案古者即被怒責雖未指鹿化馬移天徙日實使蘊藉之士聳氣坐端懷道之夫結舌筵次又言芳昔與崇競恒言自作今共臣論忽稱先朝豈不

前謂可行輒欲自取後知錯謬便推先朝殊非大臣之體深失為下之義復考校勢臣之前量度偏頗之手臣必刑足內朝抱璞人外囂言肆意彰於朝野然匡職當出納獻替所在斗尺權度正是所司若已有所見能練臧否宜應首唱義端早辨諸惑何故嘿心隨從不關一言見芳成事方出此語計芳才學與匡殊懸所見淺深不應相匹今乃始發恐此由心借智於人規成虛譽況匡表云所據銅權形如古誌明是漢作非莽別造及案權

銘黃帝始祖德布於虞虞帝始祖德布於新若莽佐漢
時事寧有銘偽新之號哉又尋莽傳云莽居攝即變漢
制度考校二證非漢權明矣復云芳之所造又短先朝
之尺臣既比之與權相合更云芳尺與千金堰不同臣
復量比因見其異二三浮濫難可據準又云共構虛端
妄為疑似託以先朝云非已製臣案此欺詐乃在於匡
不在於芳何以言之芳先被敕專造鍾律管籥優劣是
其所裁權斛尺度本非其事比前門下索芳尺度而芳

牒報云依先朝所班新尺復應下黍更不增損為造鍾律調正分寸而已檢匠造時在牒後一歲芳於爾日匠未共爭已有此牒豈為詐也計崇造寸積黍十二羣情共知而芳造寸唯止十黍亦俱見先朝詔書以黍成寸首尾歷然寧有輒欲自取之理肇任居端右百寮是望言行動靜必副具瞻若恃勢阿黨詐託先詔將指鹿化馬徙日移天即是魏之趙高何以宰物肇若無此匠既誣毀宰相訕謗時政阻惑朝聽不敬至甚請以肇匠並

禁尚書推窮其原付廷尉定罪詔曰可有司奏匡誣肇
處匡死刑宣武恕死降為光祿大夫又兼宗正卿出為
兗州刺史匡臨發帝引見於東堂勞勉之匡猶以尺度
金石之事國之大經雖前為南臺所彈然猶請更議若
議之日願聽臣暫赴帝曰劉芳學高一時深明典故其
所據者與先朝尺乃寸過一黍何得復云先朝之意也
兗州既所執不經後議之日何待赴都也明帝初入為
御史中尉匡首奏于忠次彈高聰等免官靈太后並不

許又重違其糾惡之心進號安南將軍以慰安之後加
鎮東將軍匡屢請更權衡不已於是詔令匡更集儒貴
以時驗決必務權衡得衷令寸籥不舛又詔匡特襲廣
平王洛侯爵封東平郡王匡所制尺度訖請集朝士議
定是非詔付門下尚書三府九列議定以聞太師高陽
王雍等議以為晉中書監荀勗所造之尺與高祖所定
毫釐略同侍中崔光得古象尺于時亦準議令施用臣
等仰惟孝文皇帝睿明高古所造宜為不刊之式事難改

變請停匡議詔從之匡每有奏請尚書令任城王澄時致執奪匡剛隘不平先所造棺猶在僧寺乃復脩事將輿入攻澄澄頗知之後赴省與匡遇驕卒相搃朝野駭愕澄因罪狀匡三十餘條廷尉處以死刑詔付八議特加原宥削爵除官三公郎中辛雄奏理之後特除平州刺史徙青州刺史尋為關右都督兼尚書行臺遇疾還京孝昌初卒諡曰文貞後追復本爵改封濟南王第四子獻襲薨子祖育襲武定初墜馬薨子勒義襲齊禪爵

例降

任城王雲和平五年封少聰慧年五歲景穆崩號哭不絕聲太武抱之泣曰汝何知而有成人意也獻文時拜都督中外諸軍事中都大官聽訟甚得時譽及獻文欲禪位於京兆王子推王公卿士莫敢先言雲進曰父子相傳久矣皇魏未之有革太尉源賀曰願陛下深思任城言帝竟傳位於孝文後蠕蠕犯塞雲為中軍大都督從獻文討之過大磧雲言於帝曰夷狄之馬未嘗識虎

頭楯誠令居前彼馬見之必大辟易因以大衆乘之蔑
不破矣帝從之遂大敗蠕蠕獲其首帥後仇池氏反又
命雲討平之除開府徐州刺史雲以太妃蓋氏薨表求
解任獻文不許雲悲號成疾乃許之性善撫接深得徐
方之心百姓追戀送遺一無所受再遷冀州刺史甚得
下情州人請戶輸絹五尺粟五升以報恩德孝文嘉之
詔宣告天下使知勸勵遷長安鎮都大將雍州刺史雲
廉謹自修留心庶獄挫抑豪彊劫盜大息州民頌德者

千餘人太和五年薨於州遺令薄葬勿受贈祿諸子奉
遵其旨諡曰康陪葬雲中之金陵長子澄字道鏡少好
學美鬢髮善舉止言辭清辯響若懸鐘康王薨居喪以
孝聞襲封加征北大將軍以氐羌反叛除征南大將軍
梁州刺史文明太后引見誠厲之顧謂中書令李沖曰
此兒風神吐發當為宗室領袖是行當不辱命我不妄
談也澄至州誘導懷附西南款順加侍中賜衣一襲乘
黃馬一足以旌其能轉開府徐州刺史甚著聲績朝京

師引見於皇信堂孝文詔澄曰昔鄭子產鑄刑書而晉叔向非之此二人皆賢士得失竟誰對曰鄭國寡弱懾於彊鄰人情去就非刑莫制故鑄刑書以示威雖乖古典實合權宜帝方謀革變深善其對笑曰任城當欲為魏子產也朕方創改朝制當與任城共萬世之功後徵為中書令改授尚書令齊庾薨來朝見澄音韻適雅風儀秀逸謂主客郎中張彝曰往魏任城以武著稱今魏任城乃以文見美也時詔延四廟之子下逮元孫之胄

申宗宴於皇信堂不以爵秩為列悉叙昭穆為次用家人之禮帝令宗室各賦詩言志特命澄為七言聯韻與相賡酬遂至極歡際夜乃罷後帝謀遷洛外示南討齋於明堂左个詔太常王謏命龜卜易其兆遇革澄曰易言革者更也湯武革命夏商之命故得之為吉陛下既帝有天下卜征而云革命豈得言吉邪帝厲聲曰此象云大人虎變何言不吉駕還宮即召澄澄至未及升階帝遙謂之曰向者之革今更欲論之明堂之忿懼衆人競

言沮我大計故厲色怖文武耳乃獨謂澄曰國家興自
北土徙居平城雖富有四海文軌未一此間用武之地
非可興文峻函帝宅河洛王里因茲大舉光宅中原任
城意以為何如澄深贊成其事帝曰任城我之子房也
加撫軍大將軍太子少保又兼尚書左僕射及車駕幸
洛陽定遷都之策詔澄馳駟向代開曉百司澄至代都
衆聞遷詔莫不驚駭澄援引古今徐以譬之衆皆悅服
還報會帝於滑臺帝大喜從幸鄴宮除吏部尚書及車

駕自代北巡留澄銓簡舊臣初魏自公侯以下動有萬數冗散無事澄品為三等量其優劣盡其能否之用咸無怨者駕還洛京復兼右僕射帝至北芒遂幸洪池命澄侍升龍舟帝曰朕昨夢一老公拜立路左稱晉侍中嵇紹奉迎神爽卑懼如有所求何邪澄曰陛下經商墟而弔北干至洛陽而遺嵇紹豈延祖以不得齒錄於三仁之列故託諸夢寐冀一慰藉其忠精義魄耳帝感悟即命有司求紹兆域遣使弔祭焉齊明帝廢弒自立其

雍州刺史曹虎請以襄陽內附車駕將自赴之引澄及
咸陽王禧彭城王勰司徒馮誕司空穆亮鎮南李沖等
議之禧等或云宜行或言宜止帝曰衆人意見不等宜
有客主共相起發任城與鎮南為應留之議朕當為宜
行之論諸公坐聽長者從之於是帝往復數交駕遂南
征不從澄及李沖等言後從征至懸瓠帝以疾篤還京
初帝之營洛也其宮室有清徽堂流化渠洗煩池觀德
殿凝閑堂茅茨堂有步元游凱等廡及是還宮引澄及

王公侍臣宴樂其間帝每經一堂一殿輒尋名繹義以
示公卿澄亦旁譬遠引求暢上旨帝大悅命黃門侍郎
崔光郭祚通直郎邢巒崔休等賦詩羣臣既辭帝復命
澄與諸王夜飲極醉而罷後坐公事免官尋兼吏部尚
書恒州刺史穆泰在州謀反授澄節銅虎竹使符御仗
左右仍行恒州事行達鴈門遣書侍御史李煥先赴至
即禽泰窮其黨與鉅鹿公陸叡安樂侯元隆等罪人皆
得具狀表聞帝覽表大悅曰任城可謂社稷臣正復臯

陶斷獄豈能過此顧謂咸陽王等曰汝等脫當其處不能辦此也車駕尋幸平城勞澄引見逆徒無一人稱枉帝曰必也無訟今日見之以澄正尚書車駕南伐留澄居守復兼右僕射澄表請以國秩一歲租帛助軍詔受其半帝時銳意改定冠服其後幸鄴見城中車上婦人猶有冠帽而着小襦者以責澄澄曰著者固少帝怒曰任城意欲令全著乎一言而喪邦其是之謂歟又曰王者不降佐於蒼旻朕失於簡授而令任城輩居尚書任

城其當佐朕舉天下綱維邪抑但署事而已澄曰臣實署事耳帝曰若爾只一令史足矣何必令僕為哉澄拜謝不已帝怒少解久之遷尚書左僕射從征鍾離帝崩豫受顧命宣武初有降人嚴叔懋告尚書令王肅遣孔思達潛通於齊澄信之以狀聞輒禁止肅咸陽北海二王奏澄擅禁宰輔免官歸第尋除開府揚州刺史下車封孫叔敖之墓毀蔣子文之廟表請脩復皇宗之學開四門之教詔從之先是朝議有南伐之謀以蕭寶夤為

東揚州刺史據東城陳伯之為江州刺史戍陽石以澄
總督二鎮授之節度澄於是遣統軍傅豎眼王神念等
進次大峴東關九山淮陵皆分部諸將倍道據之澄總
勒大衆駱驛相接所在克捷詔書褒美既而遇雨淮水
暴長澄狼狽引歸壽春失亡四千餘人有司奏奪開府
降二階澄頻表解州帝不許尋轉鎮北大將軍定州刺
史到州明黜陟賞罰之法蠲除百姓橫調表請公地以
賦無業貧人民間布帛不任衣者禁不聽造境內大治

澄母孟太妃薨居喪過毀士論稱之服闋除太子太保時高肇專政猜忌賢戚澄常恐不全乃率意趨襲以示荒敗所作詭越時謂為狂宣武夜崩事出倉卒高肇擁兵於外明帝沖幼朝野不安澄雖疎斥然朝望所屬領軍于忠侍中崔光等奏澄為尚書令於是衆心欣賴尋遷司空加侍中俄詔領尚書令澄表上皇誥宗制并訓詁各一卷欲以勸誡太后又奏時務所宜振舉者十條一曰律度量衡公私不同所宜一之二曰興立學校以

明黜陟之法三曰興滅繼絕各舉所知四曰五調之外
一不煩人任人之力不過三日五曰臨民之官皆須黜
陟以旌賞罰六曰逃戶代輸去來年久者若非伎作任
聽即住七曰邊兵逃亡或實陷沒皆須精檢三長及近
親若實隱之徵其代輸不隱勿論八曰工商世業之家
毋得復徵租調使專其業九曰三長禁姦不得隔越相
領戶不滿者隨近并合十曰羽林虎賁邊民有事暫可
赴戰常戍宜遣番兵代之靈太后下其奏議多異同時

四中郎將兵數寡弱不足以襟帶京師澄奏宜以東中帶滎陽郡南中帶魯陽郡西中帶恒農郡北中帶河內郡選二品三品親賢兼稱者居之省非急之作配以彊兵斯實深根固本彊幹弱枝之義太后善之復以朝議不同而止尋以疾表求解任不許澄以北邊鎮將選舉彌輕奏求重鎮將之選嚴邊防之備朝廷不以為意其後北人入寇舊都鎮將多非其人所在叛亂如澄所慮澄又奏都城府寺猶未周悉令軍旅初寧無宜動衆請

取諸職人及司州郡縣犯十杖以上百鞭以下收贖之物絹一疋輸塹二百以漸修造詔從之太傅清河王懌表駁其事因寢不行澄當官無所回避嘗奏司州牧高陽王臣雍掠殺奉朝請韓元昭前門下錄事姚敬賢專虐無君罪至不敬請付廷尉朝野憚之又奏墾田授受之制八條甚有條貫皆有益於政治者而卒不見施用西域嚙達波斯諸國各因入貢並遺澄駿馬一匹澄請付太僕以充國閑詔曰王廉貞之德有過楚相可敕付

廐以成君子之美御史中尉東平王匡奏請取景明元
年以來內外考簿吏部除書中兵勲案并諸殿最欲以
案校竊階盜官之人靈太后許之澄表以為御史之體
風聞是司至於冒勲妄階皆有處別若一處有風謠即
應攝其一簿研檢虛實苟差殊不同情偽自露然後繩
以典刑人誰不服豈有移一省之事窮革世之尤吹毛
求疵誠非聖朝盛德之事靈太后納之而止後遷司徒
公侍中尚書令如故政無大小皆引澄參預神龜元年

詔加女侍中貂蟬澄諫曰高祖世宗朝皆有女侍中官未聞其有同外侍中之飾江南偽晉穆后有女尚書而加貂璫此衰亂之世妖妄之服何足為法且婦人而服男子之服化陰為陽故自穆哀以降國統三絕劉裕因以篡代禮容舉措風化之本不可不慎請依常儀追還前詔從之時太后於京師起永寧太上公等佛寺外州復各造五級浮圖又數為一切齋會施物動至萬計兼曲賚左右日有數千百姓疲弊帑藏虛竭至削奪百官

祿力以給之澄上表極言得失雖卒不從常優答之故
為內外所敬憚二年薨贈假黃鉞使持節都督中外諸
軍事太傅領太尉公加以殊禮備九錫依晉大司馬齊
王攸故事諡曰文宣王澄之葬也凶飾甚盛靈太后親
送郊外停輿悲哭哀慟左右百官會赴千餘人莫不歔
歔當時以為哀榮之極第四子彛襲彛字子倫繼室馮
氏所生頗有父風拜通直散騎常侍及元義專權而彛
恥於附託故不得顯職莊帝初於河陰遇害贈儀同三

司青州刺史謚曰文彞庶長兄順字子和年九歲師事
樂安陳豐初書王羲之小學篇數千言晝夜誦之旬有
五日一皆通徹豐奇之白澄曰豐十五從師迄于白首
耳目所經未見此比江夏黃童不得無雙也澄笑曰藍
田生玉何容不爾十六通杜氏春秋下帷讀書篤志愛
古性謇愕淡於榮利好飲酒解鼓琴每長吟永歎吒詠
虛室宣武時上魏道頌文多不載起家為給事中時高
肇權重天下人士望塵拜伏順嘗懷刺詣肇門者以其

年少云坐有貴客不肯為通順叱之曰任城王兒可是
賤也及見直往登牀捧手抗禮王公先達莫不恠愕而
順辭吐傲然若無所覩肇謂衆賓曰此兒豪氣尚爾況
其父乎及去肇加禮送之澄聞之大怒杖之數十後拜
太常少卿以父憂去職哭泣歐血身自負土時年二十
五頓有白髮免喪抽去不復更生世以為孝思所致尋
除給事黃門侍郎時領軍元義威勢尤盛凡有遷授莫
不造門謝謁順拜表而已初不詣義義謂順曰卿何得

卿不見我順正色曰天子富於春秋委政宗翰叔父宜以至公為心舉士報國如何賣恩責人私謝豈所望也至於朝論得失順嘗鯁言正議曾不阿旨由此見憚出除恒州刺史順謂义曰北鎮紛紜方為國梗請假都督為國屏捍义心疑順不欲授以兵官謂順曰此朝廷之事非我所裁順曰叔父既生殺任已自言天歷應在我躬何得復有朝廷义彌忿憚之轉齊州刺史順自負有才不得居內每懷鬱怏形於言色遂縱酒自娛不親政

事義解領軍徵為給事黃門侍郎親友郊迎賀其得入
順曰不患不入正恐入而復出耳俄兼殿中尚書轉侍
中初中山王熙起兵討元義不果而誅及靈太后反政
方得改葬順侍坐西游園因奏太后曰臣昨往會中山
家葬非唯宗親哀其冤酷行路士庶見其一家十喪皆
為青旄莫不酸泣義妻時在太后側順指之曰陛下奈
何以一妹之故不伏元義之罪使天下懷冤太后嘿然
就德興反於營州使尚書盧同往討之大敗而還屬侍

中穆紹與順侍坐因論同之罪同先有近宅借紹紹頗欲為言順勃然曰盧同終將無罪太后曰何得如侍中之言順曰同有好宅與要勢侍中豈慮罪也紹慙不敢復言靈太后頗事粧飾數出游幸順面諍之曰禮婦人喪夫自稱未亡人首去珠珥衣不被綵陛下母臨天下年垂不惑過修容飾何以示後世靈太后慙而還入召順責之曰千里相徵豈欲衆中見辱也順曰陛下盛服炫容不畏天下所笑何恥臣之一言乎初城陽王徽慕

順才名偏相賞納而廣陽王深通徽妻于氏大為嫌隙
及深自定州被徵入為吏部尚書兼中領軍順為詔書
辭頗優美徽疑順為深左右由是與徐紇間順於靈太
后出順為護軍將軍太常卿順奉辭於西游園徽紇侍
側順指紇謂太后曰此人魏之宰嚭魏國不滅終不死
亡紇脅肩而出順抗聲止之曰一介刀筆小人正堪為
机案之吏寧應忝茲執戟虧我彛倫遂振衣而起太后
默而不言時追論順父顧託之功增任城王彛邑二千

戶又析彞邑五百戶以封順為東阿縣公順疾徽等間之遂為蒼蠅賦以見風屬疾在家杜絕慶弔後除吏部尚書兼右僕射與城陽王徽同日拜職舍人鄭儼於止車門外先謁徽後拜順順怒曰卿是佞人當拜佞王我是直人不受曲拜儼深愧謝順曰卿高門子弟而為北宮幸臣僕射李思沖嘗與王洛誠同傳以此度之卿亦應繼其卷下見者為之震動順安然自得及上省登階向榻見榻弊故以問吏吏曰此榻曾經先王坐順哽塞

流涕遽令易之時參軍曹令史朱暉素事錄尚書高陽王雍雍欲以為廷尉評頻煩託順順不為用雍遂下命用之順投之於地雍大怒昧爽至都聽召尚書及丞郎畢集欲衆辱順順至雍攘袂撫几而言曰身天子之子天子之弟天子之叔天子之相四海之內親尊莫二元順何人以身成命投棄於地順鬚鬢俱張仰視屋極憤氣奔湧長歎不言者久之徐謂雍曰高祖遷宅中土創定九流官方清濁軌儀萬古而朱暉闖冗省吏何容塵

玷廷尉清班殿下既先皇同氣誠宜遵旨自有恒規而復踰之也雍曰宰相黜陟百寮顧不得用一人為官順曰庖人雖不治庖尸祝不越樽俎而代順但知殿下錄尚書未聞有別旨令參選事殿下必如是順當隨事奏聞雍理屈遂遜辭呼順入室與飲不敢復言暉事順之方毅不撓皆此類也後兼左僕射爾朱榮之奉莊帝召百官悉至河陰素聞順數諫諍惜其亮直謂朱瑞曰可語元僕射但在省不須來順不達其旨聞害衣冠遂便

出走為陵戶鮮于康奴所害家徒四壁無以附身止有書數千卷而已門下通事令史王才達裂裳覆之莊帝還宮遣黃門侍郎山偉巡喻京邑偉臨順喪悲慟無已既還莊帝怪其聲散偉以狀對莊帝敕侍中元祉曰宗室喪亡非一不可盡贍元僕射清苦之節死乃益彰特賜絹百匹餘不得為例贈尚書令司徒公諡曰文烈初莊帝在藩順夢黑雲從西北來直觸東南日月俱破衆星散落天地斗閣有頃雲却有日出自西南隅甚明淨

見者云此長樂王日也尋見莊帝入自閭闔門登太極殿殿下呼萬歲者三百官咸加朝服唯已獨脫衣冠卧集書省步廊西槐樹下既寤以所夢告元暉業曰此於我殊不佳因語之曰黑雲者北方之沴氣日君象也月后象也衆星百官象也以事推之得無北虜亂京邑害二宮戕百僚之事乎彭城王有功德於天下今夢其兒為帝積善必報恐或然矣但惜其得之不久所以然者出自西南以時易年不過三載耳我時卧槐樹下槐字

之文從木從鬼身與鬼并復解冠冕寧能不死乎然死
後乃得三公贈耳已而皆如其占順嘗撰帝錄十七卷
詩賦表頌數十篇並多亡失長子朗時年十七枕戈潛
伏積年乃手刃康奴以首祭順墓然後詣闕請罪朝廷
嘉而不問朗位司徒屬天平中為奴所害贈尚書右僕
射順第紀字子綱隨孝武入關位尚書左僕射華山郡
王澄弟嵩字道岳孝文時位步兵校尉大司馬安定王
休薨休於嵩為叔父未及卒哭嵩便游田帝聞而大怒

詔免官後兼武衛將軍孝文南伐齊將陳顯達率衆拒戰嵩身備三仗免胄直前勇冠三軍將士從之顯達奔潰帝大悅曰任城康王大有福德文武頓出其門以功賜爵高平縣侯初孝文之發洛也馮皇后以罪幽于宮內既平顯達回次穀唐原帝疾甚將賜后死曰使人不易可得顧謂任城王澄曰任城必不負我嵩亦當不負任城可使嵩也於是引嵩入內親詔遣之宣武即位出為揚州刺史威名大震後并妻穆氏為蒼頭李太伯等

所害諡曰剛第二子世雋襲世雋頗有幹用而無行業
孝莊時遷吏部尚書爾朱兆寇京師詔世雋以本官都
督守河橋及兆至世雋隔岸遙拜即敕所領艘迎兆度
河京師破殘時論疾之尤為爾朱世隆所昵孝武初改
封武陽縣子世雋居選曹不能厲心多所受納為中尉
彈糾坐免官孝靜時位尚書令世雋輕薄好去就興和
中薨贈太尉諡曰躁戾

南安王楨皇興二年封孝文時累遷長安鎮都大將雍

州刺史楨性忠謹其母疾篤憂毀異常時有白雉遊其庭前帝聞其致感賜帛千匹以褒美之徵赴講武引見於皇信堂誠之曰公孝行既著令問復彰然宜慎者略有三事一者恃親驕矜違禮僭度二者傲慢貪奢不恤政事三者飲酒遊逸不擇交友三者不去患禍將生而楨不能遵奉乃聚歛肆情孝文以楨孝養聞名內外特加原恕削除封爵以庶人歸第禁錮終身以預議定遷都復封南安王太和二十年遷鎮北大將軍相州刺史

楨以五月至鄴上日暴風大雨凍死者數十人是歲鄴中旱楨禱于羣祀鄴舊有石虎廟楨告神像云三日不雨當以鞭罰既而不雨遂鞭像一百未幾疽發背薨諡曰惠及恒州刺史穆泰謀反楨坐知而不告追奪封爵國除子英性識聰敏善騎射解音律微曉醫術孝文時為梁州刺史帝南伐為漢中別道都將後大駕臨鍾離英以大駕親動勢傾東南漢中有可乘之會表求追討帝許之以功遷安南大將軍賜爵廣武伯宣武即位拜

吏部尚書以前後軍功進爵恒山侯尋詔英率衆南討大破梁將曹景宗軍梁司州刺史蔡道恭憂死三關戍棄城而走初孝文平漢陽英有戰功許復其封及為陳顯達所敗遂寢是役也宣武大悅乃復之改封中山王既而梁入寇肥水詔英率衆十萬討之所在皆以便宜從事英表陳事機乃擊破梁衆斬梁將二十五人及斬首五千餘級又頻破梁軍於梁城斬其支將四十二人殺獲及溺死者將五萬梁中軍大將軍臨川王蕭宏尚

書僕射柳惔等大將五人沿淮東走凡收米四十萬石
英追奔至馬頭梁馬頭戍主委城遁走遂圍鍾離詔以
師行既久命英為振旅之意英表期至二月將末三月
之初理在必尅但自此月一日以來霖雨連并可謂天
違人願然王者行師舉動不易不可以少致睽淹便生
異議願聞朝廷特開遠略少復賜寬假以日月無使為
山之功中途而廢及四月水盛破橋英及諸將狼狽奔
退士衆沒者十五六英至揚州遣使請罪送所授節及

衣冠貂蟬章綬等詔以付典有司奏英經算失圖案劾處死詔恕死為民後京兆王愉反復英王封除使持節假征東將軍都督冀州諸軍事英未發而冀州已平時郢州中從事督榮祖潛引梁軍以義陽應之三關之戍並據城降梁郢州刺史婁悅嬰城自守懸瓠人白早生等殺豫州刺史司馬悅據城南叛梁將齊苟兒率衆守懸瓠悅子尚華陽公主并為所劫宣武詔英使持節都督南征諸軍事假征南將軍出自汝南時帝以都督邢

蠻頗破早生詔英南赴義陽英以衆少累拜請軍帝不許而英輒與邢蠻分兵共攻懸瓠剋之乃引軍而南既次義陽將取三關英策之曰三關相須如左右手若剋一關則二關不待攻而定攻難不如攻易東關易攻宜須先取即黃石公所謂戰如風發攻如河決也英恐其并力於東乃使長史李華率五統向西關分其兵勢身督諸軍向東關果如英策凡禽其大將六人支將二十人卒七千米四十萬石軍資稱是還朝除尚書僕射薨

贈司徒公諡獻武王英子熙字真興好學俊爽有文名
然性輕躁浮動英深慮其非保家之主欲立第四子略
略固請乃止累遷光祿勳時領軍于忠執政熙忠之壻
也故歲中驟遷後授相州刺史以七月上官其日大風
寒雨凍死者二十餘人驢馬數十匹熙聞其祖父前事
又有蛆生于其庭心忌之初熙兄弟並為清河王懌所
昵及劉騰元義隔絕二宮矯詔殺懌熙自州起兵討之
兵起甫十日為其長史柳元章別駕游荆魏郡太守李

孝怡所執并其妻子又遣盧同斬之於鄴傳首京師熙
妃于氏前知其必敗苦諫不從自舉事哭泣不絕聲至
於熙死熙既藩王加有文學其赴鎮也知友才名之士
袁翻李琰之李神雋王誦兄弟裴敬憲等咸餞於河梁
賦詩告別及將死復與知故書述志意不遂時人憐之
先是任城王澄之未薨也熙夢有人告之曰任城當死
死後二百餘日君亦不免謂予不信試望任城家其居
既毀之矣熙夢中顧瞻任城第四壁墮落無完堵焉覺

而惡之以告所親既而任城薨熙亦尋敗皆如夢云始熙兄弟每從英征伐在軍貪暴或同迎降逐北至有斬殺無辜多增首級以為功狀又于忠之誣郭祚裴植也忠未決意害之由熙勸獎遂至極法世以為冤及熙之禍識者以為報應焉靈太后反政贈太尉公諡曰文莊王熙弟略字雋興位給事黃門侍郎熙敗略潛行自託故人河內司馬始賓始賓為荻筏夜與略俱度盟津詣上黨屯留粟法光家法光素敦信義欣而納之略舊識

刀雙時為河西太守略復歸之停止經年雙乃令從子
昌送略潛遁江左梁武甚禮敬之封中山王宣城太守
俄而徐州刺史元法僧據城南叛梁以略為大都督詣
彭城接誘初附尋徵略與法僧同還略在江南自以家
禍晨夜哭泣身若居喪又惡法僧為人與之言未嘗一
笑梁復除略衡州刺史未行會其豫章王綜以城歸國
綜長史江革司馬祖暉將士五千人悉見禽虜明帝敕
有司悉遣革等還南因以徵略梁武備禮遣之刀雙時

為光祿大夫帝詔雙境首問勞除略侍中義陽王還達
石人驛亭詔宗室親黨內外百官先相識者迎之近郊
其司馬始賓除給事中領直候栗法光本縣令刁昌東
平太守刁雙西兗州刺史略所經一食一宿處無不霑
賞尋改封東平王後為尚書令靈太后甚寵任之其見
委信殆與城陽王徽相埒於時天下多事軍國萬端略
守常自保無他裨益具臣而已爾朱榮略之姑夫略素
所輕忽略又黨於鄭儼徐紇榮兼銜之業之入洛也見

害於河陰加贈太保司徒公諡曰文貞英弟怡位鄴善鎮將在鎮貪暴為有司所糾逃免卒莊帝初以爾朱榮婦兄贈太尉扶風王子肅封魯郡王肅弟暉字華興小字盆子性輕躁有膂力莊帝初封長廣王爾朱榮死世隆等推暉為主年號建明尋為世隆所廢節閔立封為東海王孝武初被殺

城陽王長壽皇興二年封位沃野鎮都大將甚有威名薨諡康王子鸞襲鸞字宣明身長八尺腰帶十圍以武

藝稱頻為北都大將孝文初除使持節征南大將軍與
安南將軍盧陽烏李佐攻赭陽不剋敗退降為定襄縣
王後以留守功復還本封宣武時為定州刺史驚愛佛
道繕起佛寺大為百姓之擾宣武聞之詔奪祿一周薨
諡懷王子徽字顯順羸涉文史頗有吏才宣武時襲封
為河內太守在郡清整有時譽明帝時為并州刺史先
是州界夏霜安業者少徽輒開倉振之明帝嘉而不罪
加安北將軍汾州山胡舊多劫掠自徽為郡羣胡自相

戒勿得侵擾鄰州汾肆之人多來詣徽投訴願得口判
除秦州刺史還都吏民涕泣攀車不能自己徽車馬羸
弊皆京來舊物見者莫不歎其清儉改授度支尚書兼
吏部尚書尋為正徽以選舉法期在得人限以停年有
乖舊體但行之日久難以頓革以德同者書年勞等者
進德于時稱為中平除侍中餘官如故徽表乞守一官
天下士子莫不歎息咸曰城陽離選貧者復何所希怨
嗟之聲俄然上徹還令兼吏部尚書累遷尚書令時靈

太后專制朝綱顏褫徽既居寵任無所匡弼與鄭儼徐
紇之徒更相阿黨外似柔謹內多猜忌睚眦之忿必思
報復識者疾之又不能防閑其妻于氏遂與廣陽王深
通及深受任軍府每有表啓論徽罪過雖涉誣毀頗亦
實焉莊帝踐阼拜司州牧尋除司徒仍領牧元顥之入
洛也從莊帝北巡及車駕還宮以與謀之功除侍中大
司馬太尉公加羽葆鼓吹增邑通前二萬戶徽表辭官
封前後屢上徽為莊帝親待內懼爾朱榮故有此辭莊

帝識其意聽其辭封不許讓官徽後妻莊帝舅女侍中
李彧帝之姊壻徽性佞媚善自取容挾内外之意宗室
親寵莫與比焉遂與彧等勸帝圖榮莊帝亦先有意榮
死世隆等屯據不解除徽太保仍大司馬宗師錄尚書
事總統内外徽本意謂榮死後枝葉散亡及爾朱宗族
聚結謀難徽算略無出憂怖而已性多嫉妬不欲人居
其前每入參謀議獨與帝決朝臣有上軍國籌策者並
勸帝不納乃云小賊何慮不除又惜財用於時有所賞

錫成出薄少或多而中減或與而復追莊帝雅自約狹
尤亦徽所贊成太府少卿李苗徽司徒時司馬也徽待
之頗厚苗每致忠言徽多不采納苗謂人曰城陽本自
蜂目而豺聲復將露也及爾朱兆之入禁衛奔散莊帝
步出雲龍門徽乘馬奔度帝頻呼之徽不顧而去遂走
南山至故吏寇彌宅彌外雖容納內不自安乃怖徽云
官捕將至令避他所使人於路邀害之送屍於爾朱兆
孝武初贈使持節侍中太師錄尚書事司州牧諡曰文

獻子延襲爵齊受禪國除

章武王太洛皇興二年薨追贈征北大將軍章武郡王
諡曰敬無子孝文初以南安惠王第二子彬為後彬字
豹兒勇健有將材為夏州刺史以貪恠削封後除汾州
刺史胡六百餘人保險謀反彬請兵二萬帝大怒曰必
須大衆者則先斬刺史然後發兵彬奉詔大懼身先將
士討胡平之卒贈散騎常侍子融字永興儀貌壯麗性
通率有豪氣宣武初復先爵累遷河南尹融性尤貪欲

恣情聚斂為中尉糾彈削除官爵汾夏山胡叛逆連結
正平平陽詔復融前封為征東將軍持節都督以討之
融寡於經略為胡所敗後賊帥鮮于修禮寇瀛定二州
長孫承業等討之失利除融車騎將軍為前驅左軍都
督與廣陽王深等共討修禮師度交津葛榮殺修禮而
自立轉營至白牛邏輕騎擊融於陣見殺贈司空尋以
融死王事進贈司徒公加前後部鼓吹諡莊武子景愨
襲景愨弟朗即後廢帝也

樂陵王胡兒和平四年薨追封樂陵王諡曰康無子獻文詔胡兒兄汝陰王天賜之第二子永全後之襲封改名思譽孝文時為鎮北大將軍穆泰陰謀不軌思譽知而不告削封為庶人太和末復王封薨諡密王子景略襲位幽州刺史薨諡惠王

安定王休皇興二年封少聰敏為外都大官斷獄有稱孝文南伐領大司馬休嚴而執法六軍肅然及定都洛邑休從駕幸鄴命休率從駕文武迎家于平城帝親餞

休於漳水之北十八年休寢疾帝幸其第流涕問疾中
使醫藥相望於路及薨至殯車駕三臨帝至其門改服
錫衰素弁加經皇太子百官皆從行弔禮謚曰靖王詔
贈假黃鉞加羽葆鼓吹悉準三老尉元之儀帝親送出
郭慟哭而返諸王恩禮莫比焉宣武世配饗廟庭次子
燮襲拜太中大夫除華州刺史州舊居李潤堡燮表移
於馮翊古城詔從之燮薨於州贈朔州刺史子超字化
生襲時以胡國珍封安定公改封北平王後復本封爾

朱榮入洛避難見害超弟琰字伏寶大統中封宋安王
薨諡曰懿子景山字寶岳少有器局幹略過人周閔帝
時以軍功累遷開府儀同三司從武帝平齊以功拜大
將軍平原郡公豪州總管法令明肅盜賊屏迹部內大
清徵為候正宣帝嗣位從上柱國韋孝寬經略淮南鄖
州總管宇文亮反以輕兵襲孝寬孝寬為亮所薄景山
擊破之以功拜亳州總管隨文帝為丞相尉遲迥作亂
榮州刺史宇文胄與迥通謀陰以書諷景山景山執使

封書詣相府進位上大將軍以軍功遷安州總管進柱
國隨文帝受禪拜上柱國明年大舉伐陳以景山為行
軍元帥出漢口將濟江會陳宣帝殂有詔班師景山大
著威名甚為敵人所憚後數歲坐事免卒于家贈梁州
總管諡曰襄子成壽嗣成壽便弓馬為秦王庫直大業
中為西平郡通守熒弟願平清狂無行宣武初為給事
中悖惡日甚殺人劫盜公私咸患帝以戚近不忍致法
免官禁之別館館名愁思堂冀其克念帝崩乃得出靈

太后臨朝以其不悛還於別館依前禁錮久之離禁還家付宗師嚴加誨獎後拜通直散騎常侍前將軍坐裸其妻王氏於其男女前又彊奸妻妹於妻母之側御史中尉侯剛案以不道處絞刑會赦免黜為員外常侍卒

文成五王

文成皇帝七男孝元皇后生獻文皇帝李夫人生安樂厲王長樂曹夫人生廣川莊王略沮渠夫人生齊郡順王簡乙夫人生河間孝王若悅夫人生安豐匡王猛元

夫人生韓哀王安平早薨無傳

安樂王長樂皇興四年封建昌王後改封安樂王長樂性凝重獻文器愛之承明元年拜太尉出為定州刺史頓辱衣冠多不奉法百姓詣闕訟之孝文罰杖三十貪暴彌甚以罪徵詣京師後謀不軌事發賜死於家葬以王禮諡曰厲子詮字搜賢襲宣武初為涼州刺史在州貪穢政以賄成後除定州刺史及京兆王愉之反詐言國變在北州鎮咸疑朝廷有釁遣使觀詮動靜詮具以

狀告州鎮帖然愉奔信都詮與李平高殖等討愉平之
尋除侍中兼以首告之功除尚書左僕射薨諡曰武康
子鑒字長文襲後除相州刺史北討大都督討葛榮仍
兼尚書左僕射北道行臺尚書令與都督裴衍共攻信
都鑒既庸才見天下多事遂謀反降附葛榮都督源子
邕與裴衍合圍鑒斬首傳洛詔改姓元氏莊帝初許復
本族又特復鑒王爵贈司空鑒弟斌之字子爽性險無
行與鑒同反敗遂奔葛榮榮滅得還孝武帝時封潁川

郡王委以腹心之任帝入關斌之奔梁大統二年還長安位尚書令薨贈太尉諡曰武襄

廣川王略延興二年封位中都大官性明敏鞠獄稱平太和四年薨諡曰莊子諧字仲和襲十九年薨將大欽帝素委貌深衣哭之入室哀慟撫尸而出有司奏廣川王妃薨於代京未審以新尊從於卑舊為宜卑舊來就新尊詔曰遷洛之人自茲厥後悉可歸骸芒嶺皆不得就塋恒代其有夫先葬北婦今喪在南婦人從夫宜還

代葬若欲移父就母亦得任之其有妻墳於恒代夫死於洛不得以尊就卑欲移母就父宜亦從之若異葬亦從之若不在葬限身在代喪葬之彼此皆得任之其戶屬恒燕身居京洛去留之宜亦從所擇其屬諸州者各得任意詔贈諧武衛將軍諡曰剛及葬帝親臨送之子靈道襲卒贈悼王

齊郡王簡字叔亮太和五年封位中都大官簡母沮渠牧犍女也簡性貌特類外祖後為內都大官孝文嘗與

簡俱朝文明太后于皇信堂簡居帝之右行家人禮遷太保孝文仁孝以諸父零落存者唯簡每見立以待之俟坐致敬問起居停簡拜伏簡性好酒不能理公私之事妻常氏燕郡公喜女也文明太后以賜簡幹綜家事頗節簡酒簡乃至盜竊求乞侍婢卒不能禁薨諡靈王宣武時改諡曰順子祐字伯授母常氏孝文以納不以禮不許其為妃宣武以母從子貴詔特拜為齊國太妃祐位涇州刺史薨諡曰敬

河間孝王若字叔儒未封而薨追封河間諡曰孝詔京兆康王子推子太安為後太安於若為從弟非相後之義廢之以齊郡王子琛繼琛字曇寶幼敏慧孝文愛之宣武時拜定州刺史琛妃宣武舅女高皇后妹琛憑恃內外在州貪恠及還朝靈太后詔曰琛在定州唯不將中山宮來自餘無所不致何可叙用由是廢于家琛以明帝始學獻金字孝經又無方自達乃與劉騰為養息賂騰金寶鉅萬計騰為言乃得兼都官尚書出為秦州刺

史在州聚斂百姓吁嗟東益南秦二州氏反詔琛為行
臺仍充都督還攝州事琛既總軍省求欲無厭進討氏
羌大被摧破內恃劉騰無所畏憚為中尉彈糾會赦除
名還復王爵後討鮮于修禮敗免官爵後討汾晉胡蜀
卒於軍追復王爵

安豐王猛字季烈太和五年封加侍中出為柔元鎮都
大將營州刺史猛寬仁雄毅甚有威略戎夷畏愛之薨
于州贈太尉諡曰匡子延明襲宣武時授大中大夫延

昌初歲大飢延明乃減家財以拯賓客數十人并贍其家至明帝初為豫州刺史甚有政績累遷博士黃門侍郎延明既博極羣書兼有文藻鳩集圖籍萬有餘卷性清儉不營產業與中山王熙及臨淮王彧等並以才學令望有名於世雖風流造次不及熙彧而稽古淳篤過之遷侍中詔與侍中崔光撰定服制後兼尚書右僕射以延明博識多聞勅監金石事及元法僧反詔為東道行臺徐州大都督節度諸軍事與都督臨淮王彧尚書

李憲等討法僧梁遣其豫章王綜鎮徐州延明先牧徐
方甚得人譽招懷舊士遠近歸之綜既降延明因以軍
乘之復東南之境至宿豫而還遷都督徐州刺史徐州
頻經師旅人物凋弊延明招攜新故人悉安業百姓咸
附莊帝時兼大司馬元顥入洛延明受顥委寄顥敗奔
梁死於江南莊帝末喪還孝武初贈太保王如故諡曰
文宣所著詩賦讚頌銘誄三百餘篇又撰五經宗略詩
禮別義註帝王世紀及列仙傳又以河間人信都芳工

算圖乃集器準九篇芳別為之注皆行於世孫長孺孝
靜時襲祖爵

獻文六王

獻文帝七男思皇后生孝文皇帝封昭儀生成陽王禧
韓貴人生趙郡靈王幹高陽文穆王雍孟椒房生廣陵
慧王羽潘貴人生彭城武宣王勰高椒房生北海王詳
咸陽王禧字思永太和九年封加侍中驃騎大將軍中
都大官文明太后令皇子皇孫於靜所別置學選忠信

博聞之士為之師傅以作成之孝文帝以諸弟典三都
職謂禧曰弟等皆幼年任重三都折獄特宜用心夫未
能操刀而使割錦非傷錦之尤實授刀之責文明太后
亦致誠勗出為使持節開府冀州刺史後禧朝京師詔
以廷尉卿李冲為禧師時王國舍人應取八族及清修
之門禧取任城王隸戶為之深為帝責帝以諸王婚多
猥濫於是為禧聘故潁川太守隴西李輔女自河南王
幹以下皆取望族賢淑者配之有司奏冀州人蘇僧瓘

等三千人稱禧清明有惠政請世昨冀州詔曰畫野由君理非下請入除司州牧詔以禧元弟之重食邑三千戶自餘五王皆食邑二千孝文引見朝臣詔斷北音一從正字禧贊成其事於是詔年三十以上習性已久容或不可卒革三十已下見在朝廷之人語音不聽仍舊若有故為當議降黜先是帝嘗與僕射李沖論語音事沖曰四方之語竟知誰是帝者之言即為正音帝曰若如卿言將見伊洛之間復成被髮之俗卿此論實負社

稷罪合萬死沖免冠謝良久乃已至是帝復追向所責
沖者以厲羣臣且曰朕見婦女之服仍為夾領小袖意
詔書不可用乎禧對曰陛下光宅中華移風易俗皆由
臣等不能率先以致愚夫愚婦屢格明詔無所逃刑帝
曰若朕言非卿等當抗臂廷論何乃入則順旨出則異
辭書曰汝無面從退有後言卿等之謂乎尋以禧長兼
太尉公帝篤於兄弟以禧次長禮遇甚隆然亦知其貪
鄙每加切戒而終不能改後加侍中正太尉及帝崩禧

受遺輔政雖為宰輔之首而潛受賄賂姬妾數十意尚未已猶欲遠有簡聘以恣其情宣武頗惡之景明二年春召禧等入光極殿詔曰朕比纏疴疾實憑諸父令便親攝百揆宜還府司當別處分尋詔進位太保領太尉帝既覽政禧意不安遂與其妃兄兼給事黃門侍郎李伯尚等謀反帝時幸小平禧在城西小宅初欲勒兵直入金墉衆懷沮異禧心少緩自旦達晡計不決而罷是日帝息於芒山假寐浮圖陰下直寢郎符承祖薛魏孫

皆預禧謀欲乘便害帝承祖私言於魏孫曰吾聞殺天子者身癩魏孫遂止帝亦尋寤有武興王楊集始者知其事馳告變禧未知事露乃與臣妾向洪池別墅遣其齋帥劉小苟奉啟云檢行田牧遂宿於洪池其夜將士所在追禧禧自洪池東南走左右盡散唯兼防閣尹龍武獨從禧渡洛水至柏塢被禽送華林都亭著千斤鎖格龍武羽林掌衛之時熱甚禧渴悶垂死勅斷水漿侍中崔光令左右送酪漿升餘禧一飲而盡初孝文觀台中

宿有逆氣言於禧元象示變汝終為逆謀會無所成但受惡而已至是果如所言禧臨盡與諸妹公主等訣以一二愛妾為託公主哭且罵之曰兄正坐多取此輩貪逐財物致有今日何用見囑禧愧而無言遂賜死私第絕其諸子屬籍禧之諸女微給資產奴婢自餘家財悉以賚高肇趙修二家其餘賜內外百官逮于流外多者百匹下至十匹其積聚若此其宮人為之歌曰可憐咸陽王奈何作事誤金牀玉几不能眠夜蹋霜與露洛水

湛湛彌岸長行人那得度其歌遂流至江表北人之在
南者聞絃管奏之莫不灑泣禧八子長子通字曇和竊
入河內太守陸琇家琇初與通情既聞禧敗乃殺之通
弟翼字仲和後會赦詣闕上書求葬父不許乃與二弟
昌煜奔梁正光中詔咸陽京兆二王諸子並聽附屬籍
後復禧王爵葬以王禮詔暕弟坦襲翼與昌申屠氏出
暕李妃所出也翼容貌魁壯風制可觀梁武甚重之封
為咸陽王翼讓其嫡弟煜梁武不許後為青冀二州刺

史鎮郁州翼謀舉州入國為梁武所殺翼弟樹字秀和
一家獨立美姿貌善吐納兼有將略位宗正卿年十五
奔梁梁武尤器之封為魏郡王後改封鄴王數為將領
窺覷邊服爾朱榮之害百官也樹時為郢州刺史請討
榮梁武資其士馬侵擾境上孝武初御史中尉樊子鵠
為行臺率徐州刺史杜德舍人李昭等討之樹城守不
下子鵠使金紫光祿大夫張安期說之樹請委城南歸
子鵠許之殺白馬為盟樹恃誓不為戰備與杜德別還

南德不許送洛陽置景明寺樹在洛見嵩山雲南向未
嘗不引領歔歔其始發梁也取愛姬玉兒金指環以為
別其後密以寄姬示必還之意為人所告賜死未幾杜
德暴得狂疾云元樹擊我如此者不絕聲遂死李昭奉
使秦州至潼關驛夜夢樹云我得請於帝俟卿至隴然
後相取昭覺而惡之及至隴口為賀拔岳所殺子鵠尋
亦為達野拔所害孝靜時樹子貞自建業求隨聘使崔
長謙赴鄴葬父梁武許之詔贈樹太師司徒尚書令貞

既葬還江南位太子舍人及侯景南奔梁武以貞為咸陽王送景使為魏主未幾景反煜字世茂梁封為桑乾王卒於南坦一名穆字延和傲狠酗酒每於洛橋左右頓辱行人為道路所患從叔安豐王延明每切責之曰汝兇悖性與身長昔宋有東海王禧志性凡劣時人號曰驢王恐汝亦不免此號當時聞者遂號為驢王禧誅後坦兄翼樹等五人相繼南奔故坦得承襲改封敷城王永安初復本封咸陽郡王累遷侍中莊帝從容謂曰

王才非荀蔡中歲累遷當由少長朕家故有超授初禧
死後諸子貧乏坦兄弟為彭城王勰所收養故云孝武
初其兄樹見禽坦見樹長且賢慮其代已密勸朝廷除
之樹知之泣謂坦曰汝腰背雖偉無善可聞我昔因家
難不能死亡寄食江湖受其爵命令者之來非由義至
苟活而已豈望榮祿汝何肆其猜忌忘在原之義邪坦
作色而去樹死竟不臨哭後歷司徒太尉太傅加侍中
太師錄尚書事宗師司州牧雖祿厚位尊貪求滋甚賣

獄鬻官不知紀極為御史劾奏免官以王歸第尋起為
特進出為冀州刺史復專聚歛每百姓納賦除常例先
責絹五匹然後為受性好佃漁無日不出秋冬獵雉兔
春夏捕魚蟹自言寧三日不食不能一日不獵入為大
傅齊天保初準例降爵封新豐縣公除特進開府儀同
三司坐子世寶與通直散騎侍郎彭貴平誹謗妄說圖
讖有司奏當死詔並宥之坦配北營州死配所

趙郡王幹字思直太和九年封河南王位大將軍孝文

篤愛諸弟以幹總戎別道誠之曰司空穆亮年器可師
散騎常侍盧陽烏才堪詢訪汝其師之遷洛改封趙郡
王除都督冀州刺史詔以李憑為長史唐茂為司馬盧
尚之為諮議參軍以匡弼之而憑等諫幹殊不納州表
斬盜馬人於律過重尚書以幹初臨縱而不効詔切責
之後轉特進司州牧車駕南討詔幹都督中外諸軍事
給鼓吹一部甲士三百人出入殿門幹貪淫不遵政典
御史中尉李彪將糾劾之會遇幹於尚書下省屏左右

誠之而幹悠然不以為意彪遂表彈之詔幹與北海王
詳俱隨太子詣行在所及至帝密使左右察其意色無
有憂悔乃親數其過杖之一百免所居官以王還第薨
謚曰靈陪葬長陵子謚襲幹妃穆氏表謚及謚母趙等
悖禮僣常詔付宗正依禮正罪謚後在母喪聽聲樂為
御史中尉李平所彈遇赦復封後為岐州刺史謚性暴
虐明帝初臺使元延到其州界以驛邏無兵攝帥檢覈
隊主高保願列言所有之兵王皆私役謚聞大怒鞭保

願等五人各二百後數日謚召近州人夫閉門內外嚴固搜掩城人楚掠備至又無事而斬六人城中兇懼衆遂大呼屯門謚怖登樓毀梯以自固士人散走城人分守四門靈太后遣游擊將軍王崢馳駟喻之城人既見崢至開門謝罪乃罷謚州除大司農卿遷幽州刺史謚妃胡氏靈太后從女也未發坐毆其妃免官後除都官尚書車駕出拜園丘謚與妃乘赤馬犯鹵簿為御史所彈靈太后特不問薨高陽王雍幹之母弟啟論謚贈假

侍中司州牧諡貞景諡兄諡字興伯性平和位都官尚書爾朱榮之入洛陽啟莊帝欲遷晉陽帝以問諡諡爭之以為不可榮怒曰何關君事而固執也且河陰之役君忘之乎諡曰天下之事天下論之何以河陰之酷而恐元諡諡宗室戚屬位居常伯生既無益死復何損正使今日碎首流腸亦無所懼榮大怒欲罪諡其從弟世隆固諫乃止見者莫不震悚諡顏色自若居數日帝與榮登高見宮闕壯麗列樹成行乃歎曰臣一昨愚志有

遷京之意今見皇居壯觀亦何必去河洛而就晉陽也
臣熟思元尚書言深不可奪由是遷都議革永安元年
拜尚書左僕射封魏郡王諡本年長應襲王封為其父
靈王愛其弟諡以為世子故也莊帝詔復諡趙郡王歷
位司空太保太尉錄尚書事孝靜初拜大司馬薨諡孝
懿諡無他才識歷位雖重時人畧之諡弟譚頗彊立少
為宗室所推敬卒於秦州刺史譚弟讞貪暴無禮位太
中大夫封平鄉男河陰遇害

廣陵王羽字叔翻太和九年封加侍中為外都太官羽少聰慧有斷獄之稱後罷三都以羽為大理典決京師獄訟遷特進尚書右僕射又為太子太保錄尚書事孝文將南討遣羽持節安撫六鎮發其突騎夷夏寧悅還領廷尉卿及車駕發羽與太尉元丕等留守代都並加使持節十八年羽表辭廷尉不許羽奏外考令文每歲終州鎮列牧守績狀及至再考隨其品第以彰黜陟雖外有成令而內令未班內外考察理應同等臣輒推準

外考以定京官績行詔曰論考之事理在不輕問績之方應關朕聽輒爾輕發殊為躁也後孝文臨朝堂考羣臣顧謂羽曰上下二等可為三品中等但為一品所以然者上下是黜陟之科故旌綵髮之美中等守本事可大通帝又謂羽曰汝功勤之績不聞於朝阿黨之音頻干朕聽今黜汝錄尚書廷尉但居特進太保又謂尚書令陸叡曰叔翻在省之初甚著善稱自近以來偏頗懈怠豈不由卿等隨其邪偽之心今奪卿尚書令祿一周

謂左僕射元贊曰計叔翻之黜卿應大辟但以咎歸一人不復相罪今解卿少師之任削祿一周詔吏部尚書澄曰觀叔父神志驕傲可解少保又謂長兼尚書子果曰卿不能勤謹夙夜數辭以疾今解卿長兼可光祿大夫守尚書削祿一周又謂守尚書尉羽曰卿恭勤在集書殊無憂存左史之事今降為長兼常侍亦削祿一周又謂守尚書盧陽烏曰卿在集書雖非高功為一省文學之士常不以左史在意今降卿長兼王師守常侍尚

書如故奪常侍祿一周謂左丞公孫良右丞乞伏羲受
曰卿等不能正心直言罪應大辟但以事鍾叔翻故不
能別致貶二丞可以白衣守本官冠服祿卹盡皆削奪
若三年有成還復本任如其無成則永歸南畝謂散騎
常侍元景曰卿等自任集書合省逋墮致使王言遺滯起
居不修令降為中大夫守常侍奪祿一周又謂諫議大
夫李彥曰卿實不稱職可去諫議退為元士又謂中庶
子游肇及中書舍人李平識學可觀可為中第帝復引

陸叡元贊等前曰朕為天子何假中原欲令卿等子孫博見多知若永居恒北遇不好文主卿等子弟不免面牆也陸叡對曰實如明詔金氏若不入仕漢朝七葉知名亦不可得也帝大悅車駕南伐除羽開府青州刺史詔曰海服之寄故唯宗良唯酒唯田可不誠與宣武即位遷司州牧及帝覽政引入內面授司徒請為司空許之羽先淫員外郎馮俊興妻夜私遊為俊興所擊積日祕匿薨於府宣武親臨哀贈司徒諡曰慧子恭襲是為

節閔帝恭兄欣字慶樂性羸率好鷹犬孝莊初封沛郡王後封淮陽王孝武時加太師開府復封廣陵王太傅司州牧尋除大司馬孝武入關欣投託人使達長安為太傅錄尚書事欣於中興宗室禮遇最隆自廣平諸王悉居其下又為大宗師進大冢宰中軍大都督大統中為柱國大將軍太傅文帝謂欣曰王三為太傅再為太師自古人臣未聞此例欣遜謝而已後拜司徒恭帝初遷大丞相薨諡曰容欣好營產業多所樹藝京師名果

皆出其園所汲引及僚佐咸非長者為世所鄙

高陽王雍字思穆少倣儻不恒孝文曰吾亦未能測此
兒之淺深然觀其任真率素或年器晚成太和九年封
潁川王或說雍待士以營聲譽雍曰吾天子之子位為
諸王用聲名何為改封高陽後為相州刺史帝誠曰為
牧之道亦易亦難其身正不令而行故曰易其身不正
雖令不從故曰難宣武初遷冀州刺史雍之臨二州也
留心政事微有聲稱頃之入拜司州牧帝時幸雍第皆

盡家人之禮遷司空轉太尉加侍中尋除太保領太尉
侍中如故明帝初詔雍入居太極西柏堂詔決大政給
親信二十人又詔雍為宗師進太傅侍中領太尉公別
勅將作營國子監學寺給雍居之領軍于忠擅權專恣
僕射郭祚勸雍出之忠矯詔殺祚及尚書裴植廢雍以
王歸第朝有大事使黃門就詔訪之忠尋復矯詔將殺
雍以問侍中崔光光拒之乃止未幾靈太后臨朝出忠
為冀州刺史雍表暴忠罪陳已不能匡正請返私門靈

太后感忠保護之勲不問其罪除雍侍中太師領司州牧雍表請王公已下賤妾悉不聽用織成錦繡金玉珠璣違者以違旨論奴婢悉不得衣綾錦纈止於縵繒而已奴則布服並不得以金銀為釵帶犯者鞭一百太后從之而不能久也詔雍乘步挽出入掖門又以本官錄尚書事朝晡侍講明帝覽政詔雍乘車出入大司馬門進位丞相又詔依齊郡順王簡太和故事朝訖侍坐特優拜伏之禮總攝內外與元義同決庶政歲祿粟至四

萬石伎侍盈房榮貴之盛昆弟莫及元妃盧氏薨後更納博陵崔顯妹欲以為妃宣武初以崔顯世號東崔地寒望劣難之久乃聽許延昌已後踈棄崔氏僅給衣食而已未幾暴薨或云雍殺之也靈太后許賜其女伎未及遺雍遣其閭豎丁鵠自至宮內料簡四人冒以還第太后責其專擅追停之孝莊初於河陰遇害贈假黃鉞相國諡文穆雍識懷短淺又無學業雖居朝首不為時情所推自熙平以後朝政褫落及清河王懌之死元義

專政天下大責歸焉嫡子泰字伯昌頗有時譽位太常卿與雍同時遇害贈太尉公高陽王諡曰文子斌襲斌字善集歷位侍中尚書左僕射斌美儀貌性寬和居官重慎頗為齊文襄愛賞天保初準例降爵為高陽縣公拜右光祿大夫二年從文宣討契丹還至白狼河以罪賜死

彭城王勰字彥和幼而岐嶷姿性不羣太和九年封始平王加侍中勰生而母潘氏卒其年獻文崩及有所知

啟求追服文明太后不許乃毀容憔悴心喪三年不參
吉慶孝文大奇之壯而耽學雅好屬文長直禁內參決
軍國大政萬機之事無不預焉及車駕南伐領宗子軍
宿衛左右轉中書令侍中如故改封彭城王帝升金墉
城顧見堂後梧竹曰鳳凰非梧桐不栖非竹實不食今
梧竹並茂詎能降鳳乎勰曰鳳凰應德而來豈梧竹所
能降也帝善其言嘗侍內宴帝命羣臣賦詩勰既應制
帝為改一字賞之曰中令之作雖經雕刊猶是玉之本

體不見其為疵也從韋代都經上黨銅鞮山總去帝十
許步帝指道間松命總賦詩云比至吾間當就總應口
而成帝大喜後頻表解侍中不允詔贈總所生母潘氏
為彭城國太妃又除中書監侍中如故帝南討漢陽假
總中軍大將軍加鼓吹一部總以寵授頻煩乃面陳曰
臣聞兼親疎而兩並異同而建此既成文於昔臣願誦
之於後陳思求而不允愚臣不請而得豈今古云殊實
遇否大異帝大笑執總手曰二曹才名相忌吾與汝以

道德相親緣此而言無慙前烈帝親講喪服於清徽堂
從容謂羣臣曰彥和季豫等年在沖蒙早登纓紱失過
庭之訓並未習禮每欲令我一解喪服自審義解浮疎
抑而不許頃因醉坐脫爾言從故屈朝彥遂親傳說御
史中尉李彪對曰自古及今未有天子講禮臣下親承
音旨可謂千載一時者也從征沔北除使持節都督南
征諸軍事正中軍大將軍開府總親勅大衆時有二大
鳥自南方來一向行宮一向幕府各為人所獲總以為

祥言之於帝帝戲之曰烏之畏威豈獨中軍之畧朕亦分其一爾明日果大破崔景蕭衍等軍帝令勰為露布既就殊類帝文見者咸謂御筆及至豫州帝為家人書與勰曰每欲立一宗師肅我九族汝親則宸極官則中監風標才器實足軌範宗制之重捨汝誰寄有不遵教典隨事以聞帝不豫勰內侍醫藥外總軍國之務有國醫徐審者告歸洛陽勰急召至在所泣涕祈請悲感左右乃密為壇於汝水之濱用周公故事為帝請命帝疾

稍瘳自懸瓠幸鄴勰常侍坐輿輦晝夜不離其側飲食
必先嘗之而後手自進御車駕還京會百僚於宣極堂
行飲至策勲之禮以勰功為最尋以勰為司徒太子太
傅侍中如故俄而齊將陳顯達內寇帝復親討之詔勰
持節都督中外諸軍事總攝六師帝仍不豫至馬圈疾
甚謂勰曰霍子孟以異姓受託汝既親賢不可不勉也
勰泣曰士於布衣猶為知己盡命況臣託靈先皇誠應
竭股肱之力但臣出入喉膺每跨時要此乃周旦遁逃

成王疑惑之日臣非所以辭勤請免正欲仰成陛下日
鏡之明下令愚臣獲避退之福帝久之曰吾思汝言理
實難奪乃手詔宣武曰汝第六父勰清規懋賞厭榮辭
綏吾百歲後當聽其遂冲挹之性也帝崩于行宮祕謁
喪事勰獨與右僕射任城王澄及左右數人為計舉喪
於安車中勰等視疾進膳可決外奏如常時既達宛城
乃夜進安車於郡聽事得歛襯還載卧輿六軍內外莫
有知者遣中書舍人張儒奉詔徵宣武會駕梓宮至魯

陽乃發喪行服宣武即位勰跪授遺勅數紙咸陽王禧
疑勰為變停於魯陽郡外久之乃入謂勰曰汝非但辛
勤亦危險至極勰恨之對曰兄識高年長故知有夷險
彥和握蛇騎虎不覺艱難禧曰汝恨吾後至耳自孝文
不豫勰常居中侍醫至於衣不解帶亂首垢面帝患久
多忿因之遷怒勰每被詬詈言至厲切威責近侍動將
誅斬勰承顏悉心多所匡濟及帝昇遐齊將陳顯達奔
遁始爾慮凶問洩漏致有逼迫勰內雖悲慟外示吉容

出入俯仰神貌無異及至魯陽東宮官屬多疑總有異志竊懷防懼而總推誠盡禮卒無纖介之過總上諡議協時肇享曰孝五宗安之曰孝道德博聞曰文經天緯地曰文上尊號為孝文皇帝廟號高祖陵曰長陵帝從之既葬帝固以總為宰輔總頻口陳遺旨請遂素懷帝對總悲慟每不許之頻表懇切帝難違遺勅欲遂其雅情猶逼以外任乃以總為都督定州刺史總仍陳讓帝不許乃述職帝與總書極家人敬請總入京景明初齊

豫州刺史裴叔業以壽春內屬詔勰都督南征諸軍事
與尚書令王肅迎接壽春復授司徒又詔以本官領揚
州刺史進位大司馬領司徒齊將陳伯之屯於肥口胡
松又據梁城勰部分將士頻戰破之淮南平徵勰還朝
初勰之定壽春獲齊汝陰太守王果豫州中從事庾稷
等數人勰傾意禮之常參坐席果承間求還江外勰矜
而許之果又謝曰果等今還仰負慈澤請俟仁駕振旅
然後反跡其為遠人所懷如此勰至京師頻表辭大司

馬領司徒及所增邑乞還中山有詔不許乃除錄尚書
侍中司徒如故固辭不允時咸陽王禧驕矜不法北海
王詳陰言於帝又言勰大得人情不宜久在宰輔勸帝
遵遺勅禧等又出領軍于烈為恒州烈深以為忿烈子
忠常在左右密令忠言於帝宜早自攬政時初祭王公
並齋於廟東坊帝遣于烈將壯士六十人召勰禧詳等
引見帝謂勰曰頃南北務殷不容仰遂沖操朕何敢久
違先勅今遂叔父高蹈之志勰等拜謝詔為勰造宅務

從簡素以遂其心。總知見讒作蠅賦以自喻。又以總為太師。總固辭。詔侍中敦喻。帝又為書於總。崇家人之禮。總不得已應命。及京兆廣平王暴虐不法。制宿衛隊主率羽林虎賁幽守諸王於其第。總表切諫。帝不納。時議定律令。總與高陽王雍八座朝士有才學者五日一集參論軌制。應否之宜。凡所裁決。時彥歸仰。又加侍中。總敦尚文史。撰自古帝王賢達至於魏世子孫族從為三十卷。名曰要略上之。尚書令高肇性兇愎。其兄女入為

夫人順皇后崩帝欲以為后勰固執以為不可肇憾之初勰嘗任其舅潘僧固為長樂太守京兆王愉構逆僧固見逼在其黨中至是肇慮言僧固之參逆謀勰實使之勰國郎中令魏偃前防閤高祖珍希肇提携構成其事肇初令侍中元暉以奏暉不從又令左衛元珍言之帝訪暉暉明勰無此帝更以問肇肇以偃祖珍為證帝信之永平元年九月召勰及高陽王雍廣陽王嘉清河王懌廣平王懷及高肇等入時勰妃方產固辭不得已

與妃訣而登車入東掖門度橋牛傷心惡之宴於禁中
夜皆醉各就別所消息俄而元珍將武士齎毒酒至勰
曰一見至尊死無恨也珍曰至尊何可復見武士以刀
鑲築之勰乃飲武士就殞之向晨以褥裹尸輿歸其第
云過醉而薨勰妃李氏司空沖之女也號哭曰高肇枉
害忠良如使天道有靈汝亦行當如我及肇誅復於此
室論者知有報應焉勰既有功於國無罪見害舉朝喪
氣行道士女莫不掩泣景明報德二寺千餘僧鳴鐘將

齋聞輿喪皆嗟痛不食飲水而罷帝為舉哀東堂追贈
假黃鉞使持節都督中外諸軍事司徒公太師給鸞輅
九旒虎賁班劍百人前後部羽葆鼓吹輜輶車有司奏
太常卿劉芳議諡保定大功曰武善問周達曰宣宜諡
武宣王詔可及莊帝即位追號文穆皇帝妃李氏為文
穆皇后遷神主於太廟稱肅祖節閔帝時去其神主嫡
子劭字子訥襲封劭善武藝少有氣節明帝初梁將寇
邊劭表上粟九千斛資絹六百匹國吏二百人以充軍

用靈太后嘉其至意不許累遷雍州刺史孝昌末靈太后失德四方紛擾劭遂有異志為安豐王延明所啟徵入為御史中尉莊帝即位尊為無上王尋遇害河陰追諡曰孝宣皇帝妻李氏為文恭皇后子韶字世胄好學美容儀初爾朱榮將入洛父劭以韶寄所親滎陽太守鄭仲明仲明尋為城人所殺韶因亂遇盜幾見害賴仲明兄子僧副拒賊脫之於難次值一老嫗匿之居十餘日莊帝訪而獲焉襲封彭城王齊神武後以孝武帝后

配之魏室奇寶多隨后入韶家有二玉鉢相盛轉而不
可出馬腦榼容三升玉縫之皆稱西域鬼作也歷位太
尉侍中錄尚書事司州牧特進太傅齊天保元年降爵
為縣公韶性行溫裕以高氏壻頗膺時寵能自謙退臨
人有惠政好儒學禮致才彥愛林泉脩第宅華而不侈
文宣嘗剃韶鬚鬚加以粉黛衣婦人服以自隨曰我以
彭城為嬪御譏元氏微弱比之婦女十年太史奏云今
年當除舊布新文宣謂韶曰漢光武何故中興韶曰為

誅諸劉不盡於是乃誅諸元以厭之遂以五月誅元世
哲景武等二十五家餘十九家並禁止之韶幽於京畿
地牢絕食啗衣袖而死及七月大誅元氏自昭成已下
並無遺焉或父祖為王或身常貴顯或兄弟彊壯皆斬
東市其嬰兒投於空中承之以稍前後死者凡七百二
十一人悉投屍漳水割魚者多得爪甲都下為之久不
食魚世哲從弟黃頭使與諸囚自金鳳臺各乘紙鴟以
飛黃頭獨能至紫陌乃墜仍付御史獄畢義雲餓殺之

總第三子子攸是為孝莊帝

北海王詳字季豫美姿容善舉止太和九年封加侍中
孝文自洛北巡詳常與侍中彭城王勰並在輿輦陪侍
左右至文成射銘所帝停駕詔諸弟及侍臣皆試射遠
近諸人皆去一二十步唯詳箭及之帝拊掌欣笑遂詔
勅銘親自為制車駕南伐詳行中領軍留守孝文臨崩
顧命詳為司空輔政宣武攬政為中大將軍錄尚書事
及咸陽王禧之謀反詳表求解任制不許除太傅領司

徒侍中錄尚書事如故詳之拜命其夜暴風雷電拔其庭中桐樹大十圍倒立本處初宣武之攬政詳聞彭城王勰有震主之慮而欲奪其司徒大懼物議故為大將軍至是乃居之識者以天威如此知其必不終詳既以季父崇寵位望兼極貪冒無厭公私營販又於東掖門外規占第宅至有喪柩在室請延至葬而不見許輿櫬巷次行路哀嗟詳母高太妃頗助威虐怨響嗷然妃宗王劉昶女不見答禮寵妾范氏愛等伉儷及死葬訖猶

毀隧視之又烝於安定王燮妃高氏即茹皓妻姊詳既素附於皓又緣淫好往來綢繆詳雖貪侈宣武禮敬尚隆常別住華林園西隅與都亭宮館相接帝每潛幸其所肆飲終日與高太妃相見呼為阿母伏而上酒禮若家人臨出高每拜送舉觴祝言願官家千萬年壽歲一入妾母子舍也初宣武之親政詳與咸陽王禧彭城王勰並被召入共乘犢車防衛嚴固高時惶迫以為必死亦乘車傍路哭送至金墉及詳得免高云自今以後不

願富貴但令母子相保共汝埽市作活也至此貴寵榮
盛不復言有禍敗之理後為高肇所譖云詳與皓等謀
逆時詳在南第帝召中尉崔亮入禁糾詳貪淫及茹皓
劉胄常季賢陳埽靜等專恣之狀夜即收禁南臺又命
虎賁百人圍守詳第夜中慮其驚懼奔逸遣左右郭翼
開金墉門馳出喻之示以中尉彈狀詳母高見翼頓首
號泣不能自勝詳言審如中尉所糾何憂也人奉我珍
異貨物我實受之果為取受吾何憂乎至明皓等皆賜

死引高陽王雍等五王入議詳罪單車防守還華林館
母妻相與哭入所居小奴弱婢數人隨從防援甚嚴徙
就太府寺免為庶人別營坊館於洛陽縣東北隅如法
禁衛限以終身名曰思善堂將徙詳居之會其家奴陰
結黨輩欲攻劫出之密抄名字潛託侍婢通於詳詳始
得執省而門防主司遙見突入就詳手中覽得呈奏帝
密令害之詳自至太府寺令其母妻還居南宅五日一
來後夜母妻不來死於奴婢手中詔喪還南宅諸王皇

宗悉令奔赴贈物一依廣陵故事詳之初禁乃以淫高
事告母母大怒詈之曰汝自有妻妾侍婢何共高麗婢
姦令致此罪我得高麗婢當噉其肉乃杖詳背及兩脛
百餘下自行杖力疲乃使奴代高氏素嚴詳每有微罪
常加責罰以絮裏杖至是去絮槌之又杖其妃劉數十
云新婦大家女門戶匹敵何所憚而不檢校夫壻劉笑
而受罰卒無所言詳貪淫之失雖聞而死罪無定名遠
近歎之永平元年十月詔追復王爵諡曰平王子顥襲

顥字子明少慷慨有壯氣為徐州刺史尋為御史彈劾除名後賊帥宿憖明遠叱干騏驎等寇亂幽華等州乃復顥王爵兼左僕射西道行臺以討明遠頻破賊解幽華之圍後蕭寶夔等大敗於平涼顥亦奔還京師武泰初為相州刺史以禦葛榮屬爾朱榮入洛推立莊帝授顥太傅顥以葛榮南侵爾朱縱害遂盤桓顧望圖自安之策事不諧遂與子冠受奔梁梁武以為魏主假之兵將令其北入永安二年四月於梁國城南登壇燔燎年

號孝基莊帝詔濟陰王暉業於考城拒之為顥所禽莊
帝北幸顥遂入洛改稱建武元年顥以數千之衆轉戰
屢克據有都邑號令自己天下人情想望風政自謂天
之所授頗懷驕怠宿昔賓客近習之徒咸見寵待干擾
政事又日夜縱酒不恤軍國所統南兵陵竊市里朝野
失望莊帝與爾朱榮還師討顥顥自於河梁拒戰冠受
戰敗被禽顥自輟輶出至臨潁為臨潁縣卒所斬初顥
入洛其日暴風欲入閭闔門馬大驚不進令人執轡乃

入有恒農楊曇華告人曰顥必無成假服袞冕不過六十日又諫議大夫元昭業曰昔更始自洛陽而西初發馬驚奔觸北宮鐵柱三馬皆死而更始卒不成帝位以古譬今其兆一也至七月果敗孝武初贈太師大司馬顥弟頊莊帝初封東海王位中書監及顥入洛成敗未分便以意氣自得為時人所笑顥敗潛竄為人執送斬於都市孝武初贈太尉

孝文六王

孝文皇帝七男林廢后生廢太子恂文昭皇后生宣武
皇帝廣平文穆王懷素貴人生京兆王愉羅夫人生清
河文獻王懌汝南文宣王悅鄭充華生皇子怵未封早
夭

廢太子庶人恂字元道生而母死文明太后撫視之常
置左右年四歲太后親為立名於是大赦太和十七年
七月癸丑立為皇太子及冠於廟孝文臨光極東堂引
恂入見誠以冠義曰字汝元道所寄不輕汝當尋名求

義以順吾旨二十年改字宣道遷洛詔恂詣代都其進
止禮儀帝皆為定及恂入辭帝曰今汝不應向代但太
師薨於恒壤朕既居皇極之重不容輕赴舅氏之喪欲
使汝展哀舅氏拜汝母墓一寫為子之情山陵在彼汝
至彼太師事畢後日宜一拜山陵拜訖汝族祖南安可
一就問訊在途當溫讀經籍如日親見吾也後帝每歲
征幸恂常留守主執廟祀恂不好讀書體貌肥大深忌
河洛暑熱意每追樂北方中庶子高道悅數苦言致諫

恂甚銜之孝文韋嶺嶽恂留守金墉謀欲召牧馬輕騎
奔代手刃道悅於禁中領軍元徽勒門防遏夜得寧靜
帝聞之駭惋外寢其事仍至汴口而還引恂數罪與咸
陽王禧等親杖恂又令禧等更代百餘下扶曳出外不
起者月餘拘於城西別館引見羣臣於清徽堂議廢之
司空太子太傅穆亮尚書僕射少保李沖並免冠稽首
而謝帝曰古人有言大義滅親此小兒今日不滅乃是
國家大禍脫待我無後恐有永嘉之亂乃廢為庶人置

之河陽服食所供粗免饑寒而已帝幸代遂如長安中尉李彪承間密表告恂復與左右謀逆帝在長安使中書侍郎邢巒與咸陽王禧奉詔齎椒酒詣河陽賜恂死時年十五歲欽以麤棺常服瘞於河陽城二十二年冬御史臺令史龍文觀坐法當死告廷尉稱恂前後被攝左右之日有手書自理不知狀而中尉李彪侍御史賈尚寢不為聞尚坐繫廷尉時彪免歸帝在鄴尚書表收彪付洛會赦遂不窮其本末賈尚出繫累疾數日死初

帝將為恂娶司徒馮誕長女以女幼待年長先為聘彭城劉長文滎陽鄭懿女為左右孺子時恂年十三四帝嘗謂郭祥崔光宗弁曰人生須自放不可終朝讀書我欲使恂旦出省經傳食後還內晡時復出日夕而罷卿等以為如何光曰孔子稱血氣未定戒之在色太子尚以幼年涉學之日不宜於正晝之時捨書御內又非所以安柔弱之體固永年之命帝以光言為然乃不令恂晝入內無子

京兆王愉字宣德太和二十一年封拜都督徐州刺史以彭城王中軍長史盧陽烏兼長史州事巨細委之陽烏宣武初為護軍將軍帝留愛諸弟愉等常出入宮掖晨昏寢處若家人焉遷中書監為納順皇后妹為妃不見禮答愉在徐州納妾李氏本姓楊東郡人夜聞其歌悅之遂被寵嬖罷州還京欲進貴之託右中郎將趙郡李時顯為之養父就之禮迎產子寶月順皇后召李入宮毆擊之彊令為尼於內以子付妃養之歲餘后父于

勁以后久無所誕乃表勸廣嬪御因令后歸李於愉愉寵愛更甚愉好文章頗著詩賦時引才人宋世景李神雋祖瑩邢晏王遵業張始均等共申宴喜招四方儒學賓客嚴懷真等數十人館而禮之所得穀帛率多散施又崇信佛道用度常至不接與弟廣平王懷頗相誇尚競慕奢麗貪縱不法於是宣武攝愉禁中推案杖愉五十出為冀州刺史始愉自以職非親要勢劣二弟潛懷愧恨頗見言色又以幸妾屢被頓辱內外離抑及在州

謀逆遂殺長史羊靈引及司馬李遵稱得清河王密疏云高肇篡殺主上遂為壇於信都之南柴燎告天即皇帝位赦天下號建平元年立李氏為皇后宣武詔尚書李平討愉愉出拒王師頻敗遂嬰城自守愉知事窮攜李及四子數十騎出門諸軍追之見執以送平詔徵赴京師申以家人之訓愉每止宿亭傳必携李氏盡其私情雖鎖繫之中飲賞自若略無愧懼之色至野王愉語人曰雖主上慈深不忍殺我吾亦何面目以見至尊於

是歔歔流涕絕氣而死時年二十一或云高肇令人殺之歛以小棺瘞之諸子至洛皆見殺後靈太后令愉四子皆附屬籍追封愉臨洮王寶月乃改葬父母追服三年寶月弟寶炬是為文帝

清河王懌字宣仁幼而敏慧美姿貌孝文與彭城王勰甚器異之並曰此兒風神外偉黃中內潤若天假之年則方二南矣博涉經史兼綜羣言有文才善談理寬仁容裕喜怒不形於色太和二十一年封宣武初拜侍中

轉尚書僕射懌才長從政明於斷決剖判衆務甚有聲
名司空高肇以帝舅寵任既擅威權謀去良宗屢譖懌
及京兆王愉等愉不勝其忿怒遂舉逆冀州肇因愉之
逆又譖殺彭城王勰懌恐不免肇又錄囚徒以立私惠
懌因侍宴酒酣乃謂肇曰天子兄弟詎有幾人而炎炎
不息昔王莽頭禿亦藉渭陽之資遂篡漢室今君曲形
見矣恐復終成亂階又言於宣武曰臣聞唯器與名不
可以假人是故季氏旅泰宣尼以為深譏仲叔軒懸邱

明以為至誠諒以天尊地卑君臣道別宜杜漸防萌無相僭越至於減膳錄囚人君之事令乃司徒行之詎是人臣之義且陛下修政教解獄訟則時雨可降玉燭自和何使明君失之於上姦臣竊之於下長亂之基於此在矣宣武笑而不應孝明熙平初遷太尉侍中如故詔懌裁門下之事又典經義注時有沙門惠憐者自云呪水飲人能差諸病病人就之者日有千數靈太后詔給衣食使於城西南治療百姓懌表諫曰臣聞律深惑衆

之科禮絕妖淫之禁皆所以大明居正防遏姦邪昔在漢末有張角者亦以此術熒惑當時論其所行與今不異遂能眩誘生人卒致黃巾之禍天下塗炭數十年間角之由也昔新垣姦不登於明堂五利僥終嬰於顯戮此事可為至鑒靈太后深納之太后以懌孝明懿叔德先具瞻委以朝政事擬周霍懌亦竭力匡輔以天下為己任領軍元义太后之妹夫也恃寵驕盈懌裁之以法每欲黜之為义所疾义黨人通直郎宋準等希义旨告

懌謀反禁懌門下訊問左右及朝貴無驗乃釋焉懌以忠而獲謗乃鳩集昔忠烈之士為顯忠錄二十卷以見志焉正光元年七月又與劉騰逼孝明於顯陽殿閉靈太后於後宮囚懌於門下省懌誣伏遂害之時年三十四朝野貴賤知與不知含悲喪氣驚振遠近夷人在京及歸聞懌之喪為之勢面者數百人神龜三年追封范陽王諡曰文獻以禮加葬後更追復為河間王子亶襲亶子善見是為孝靜帝

廣平王懷太和二十一年封累遷驃騎大將軍孝明即位拜司空尋進太保領司徒二年薨諡曰文穆長子誨孝昌二年封范陽王第三子修是為孝武帝

汝南王悅景明四年封悅好讀佛經覽書史為性不倫倣儻難測累遷開府儀同三司熙平二年坐殺人免官以王還第悅妃閭氏即東海公之女也生一子不見禮答有崔延夏者以左道干悅教服松朮之劑冀以得仙悅惑之輕與出外採藥暴露原野遂斷酒肉梁稻唯啖

麥飯又絕房中而更好男色輕忿妃妄動加捶撻悅嘗
野宿靈太后勅檢問其妃引入窮悅事故妃病杖牀褥
瘡尚未愈太后因令自今諸王及三藩正妃病百日已
上者皆遣奏聞若有猶行捶撻就削封位及清河王懌
為元義所害悅了無讎恨之意乃以桑落酒餞伺義盡
其私佞之情義大喜以悅為侍中太尉臨拜日就懌子
亶求懌服翫之物不時稱旨乃召亶杖之百下亶居廬
未葬形氣羸弱暴加威撻殆至不濟悅仍呼阿兒親自

拊循尋遷太保出為徐州刺史至州乃為大剉確置於
州門云有盜者即斬其腕姦偷懼其無常能行異事為
之暫息孝昌二年復領太尉及爾朱榮舉兵向洛悅遂
奔梁梁武甚相資待莊帝崩遂立為魏主年號更興節
閔初遣兵送悅置於境上以覬侵逼及齊神武誅爾朱
以悅孝文子宜承大業乃令人示意悅既至清狂如故
動為罪失乃止孝武初除大司馬開府孝武以廣陵頗
有德望以悅屬尊地近內懷畏忌故前後害之贈假黃

鉞太師司州牧大司馬王如故諡曰文宣子穎與父奔
梁卒於江左

皇子悅年七歲景明元年薨葬文昭皇后陵東後以增
廣文昭后墳塋徙寔北岡

李延壽曰魏自西遷之後權移周室周文天縱寬仁性
平猜忌元氏戚屬並見保全內外任使布於列職孝閔
踐阼無替前緒明武纘業亦遵先志雖天厭魏德鼎命
已遷枝葉榮茂足以愈於前代矣

通志卷八十四下